

四庫全書

子部

欽定四庫全書

春明夢餘錄卷六十八

吏部左侍郎孫承澤撰

巖麓

京師之西皆山也舊記太行山首始河內北至幽州第八陁在燕強形鉅勢爭奇擁翠雲從星拱於皇都之右玉泉山在京西二十餘里山頂懸崖舊刻玉泉二字水自石罅中出鳴如雜佩金章宗行宮芙蓉殿之故址也

半嶺有呂公岵廣盈丈許深倍之相傳呂僊宴坐處

甕山在玉泉山之傍西湖當其前金山拱其後山有寺
曰圓靜寺山之陽有耶律楚材墓

都人王嘉謨石甕記燕之西山有甕山焉純盧土
中多杏枿榆柳之屬余嘗遊其間其南巖若洞而
圯者一樵人曰此少鬲仙室也久之遊丁公潭問
於漁父漁父曰甕山蓋市中之異域云昔吾大父
嘗聞山中有父老能繕生久而去之俄而來云山

麓魁然而大凹而秀者甕之屬也因鑿之得石甕
一倍於常甕華蟲雕鑿不可辨中有物數十種父
老悉攜以去置甕山西因為識曰石甕徙貧帝里
人不之信也嘉靖初甕不知所存僕老矣睹吾里
中之世變習矣夫甕何為余喟然而歎曰有味乎
父老之言父老何用識之漁父曰成宏以往非吾
所知也聞之宏治中帝京世臣富嘉靖中商富隆
慶俠富今之時並治而昔之富者遷徙靡常僕何

足以知之夫幽薊馬四足可當中人之產棗栗千
子可食數口蔬百畦可當五帛相思桃李芳實雜
還屯軍日夜織作純緣輕縠薰燧丹綠則天下之
沃饒也列聖培養小民守法豈獨先世號為太平
哉宏治以後外戚邊臣都公卿之右握兵席寵氣
勢炎炎世祿者為之役則武斷鄉里都人以軍為
美募郊而居屋相比也又謹事上時時餽食有所
制無所爭吏攝於主者不敢問則世臣富世宗慨

然求治破去煩擾法令日新民莫之式於是文武
奉法利害一切公之於下加以求仙采補異好奇
珍之絡繹則商賈重醯賈外攝府賈內羸雜賈疽
食奄人地之即竹木之場陶冶之技亦富千室及
至隆慶所好靡靡矣於是姦人之雄習刀筆觀時
變其言曰所謂富者豈守子母錢而日為愚也禍
且立至故不如求百倍之利乃鮮衣怒馬以交於
貴人倚憑則高如青雲接趨則汙如溝染已而睚

則挾之怨則箝之勿頸託於非類千金轉於片言
風扇波流無復綱紀其勢斯極乃今又不無少變
矣說者曰帝里侈是未見天成之豪麗宣洪之清
泰也曩者燕市夏屋樓觀重縷連鈴貴人造佛寺
渴泉飛山佛身純金七寶瑩渥中人燕享水陸區
殫后軒美人曳縞紵秣陵之穀初於中單秀水機
杼不藉而靡少年日夜歌吹東西樂部倡家樓閣
通天乳煎鏤蛤冬果春蔬棄之如遺賞賜動以千

計三正元會酺樂燈火奧若連山狀於六鰲生花
舞鳥閉機其中舉火樹者萬萬計荆揚估船日夜
集於大市而今安有之衣文之巧日變日儉故有
屋設而寡堅黑伎者或改而市矣元夕寥寥數人
行少年博具數錢而攤司空召商具五刑泥首號
哭家立破敗四方異味日至物價翔踊器更狹楯
轉儼他方賈者日夜心計市魁大姦其迹莖莖則
何以稱也夫財通物富美名也逋之於不可知變

之於不可繼豈石甕之為乎且以為誕也余默然
夫時變不一知者所難父老何言之易夫變之與
來固不能必也是故成宏之有嘉隆猶先朝之有
今日也豈必需於灾祲之故志識之微哉藏舟於
壑流遁繼之夫甕也又何知語曰觀俗於野父老
其似之矣歸而記之

都人李東陽記西山自太行聯亘起伏數百里東
入於海而都城中受其朝靈秀之所會屹為層峯

滙為西湖湖方十餘里有山趾其涯曰甕山其寺
曰圓靜寺左田右湖近山之境於是始勝又三里
為功德寺洪波衍其東幽林出其南路盡叢薄始
達於野乃有玉泉出於山噴薄轉激散為溪池池
有亭宣廟巡幸所駐蹕處也又一里為華嚴寺有
洞三其南為呂公洞一竅深黑投之石有水聲數
步不可下竟莫有窮之者

五湖朱長春記西山之勝衆矣不能紀紀其所過

遊自玉泉山始其泉流為西湖玉河發焉車馬遵
溪以入其山於諸山突而前延延遠望如金首戴
土猶冠也近削立而尊如屏華嚴寺南倚之寺燬
存其寢拾級升有平臺望湖焉見帝都焉壁當寢
後洞在壁間洞戶沈沈黑若無人者入久而白燭
光照其上下下乳如露盡其洞四丈而修廣丈有
奇左右石牀最裏見石龕也暮僧燃葦薪助之復
見兩石壁詩自元丞相揭里以來其上又有洞其

頂有故金芙蓉宮址章宗避暑宮也未至山之右
挽梟而蛇盤曰金山寺自華嚴而下度三石橋折
水而門臨之水清鑑毛石齒齒然藻蘊葢葢然其
中無魚陰水也金山觀不如華嚴軒楹差之可以
寢處客多宿者右盤而西北緣崗而途蛺蝶以曼
衍皆山也崆峒高下隈粵巖巖然其林木參焉日
之所照垣翼朱丹五采則嬪嬙內人大璫瑩焉秣
黍菽粟油油交於林間有果園稍稍有蘇牧村落

也

陸鉞記出平則門行可數里清風徐來塵意灑落
遂遵湖堤繞村徑後先惟意行歌相答舉盼間樓
臺鱗次出沒烟靄若非人世所有者午至功德寺
主僧汲泉淪茗酒數進起陟英廟行宮已乃促騎
西往緣崖攀磴穿雲霧間溪花石竹幽芳襲人徐
憇玉泉登望湖亭撫看花臺道傍諸刹不能遍歷
惟聽主僧談名耳

李流芳記出西直門過高粱橋可十餘里至元君
祠折而北有平堤十里夾道皆古柳參差掩映澄
湖百頃一望渺然西山勾芻與波光上下遠見功
德古剎及玉泉亭榭朱門碧瓦青林翠嶂互相綴
發湖中菰蒲零亂鷗鷺翩翩如在江南畫圖中
公安袁宏道高粱橋遊紀高粱橋在西直門外京
師最勝地也兩水夾堤垂楊十餘里流急而清魚
之沉水底者鱗鬣皆見精藍棋置丹樓珠塔窈窕

綠樹中而西山之在几席者朝夕設色以娛遊人
當春盛時城中士女雲集縉紳士大夫非甚不暇
未有不一至其地者也三月一日偕王生章甫僧
寂子出遊時柳稍新翠山色微嵐水與堤平絲管
夾岸趺坐石根上茗飲以為酒浪紋樹影以為侑
魚鳥之飛沉人物之往來以為戲具堤上遊人見
三人坐枯樹下若癡禪者皆相視以為笑而余等
亦竊謂彼筵中人諠囂怒詬山情水意了不相屬

於樂何有也少頃遇同年黃昭質拜客出呼而下
與之語步至極樂寺觀梅花而返

公安袁中道紀出西直門過高粱橋楊柳夾道帶
以清溪流水澄澈洞見沙石蘊藻縈蔓鬣走帶牽
小魚尾遊翕忽跳達亘流背林禪刹相接綠葉穠
鬱下覆朱戶寂靜無人鳥鳴花落過響水聞聽水
聲汨汨至龍潭堤樹益茂水益濶是為西湖也每
至盛夏之月芙蓉十里如錦香風芬馥士女駢閑

臨流泛觴最為勝處矣憇青龍橋橋側數武有寺
依山傍巖古栢陰森石路千級山腰有閣翼以千
峯縈抱屏立積嵐沉霧前開一鏡堤柳溪流襟以
畦畛叢翠之中隱見村落降臨水行至功德寺寬
博有野致前繞清流有危橋可坐寺僧多業農事
日已西見道人執畚者鋪者帶笠者野歌而歸有
老僧持杖散步塍間水田浩白羣蛙皆鳴噫此田
家之樂也予不見此者三年矣

又裂帛湖記功德寺循河而行至玉泉山麓臨水
有亭山根中時出清泉激噴巉石中悄然如語至
裂帛泉水仰射沸水結雪滙於池中見石子鱗鱗
朱碧磊砢如金沙布地七寶粧施蕩漾不停閃爍
晃耀注於河河水深碧泓渟澄澈迅疾潛鱗了然
荇髮可數兩岸垂柳帶拂清波石梁如雪鴈齒相
次間以獨木為橋跨之濯足沁涼入骨折而南為
華嚴寺有洞可容千人有石狀可坐又有大士洞

石理詰曲突兀奮怒較華嚴洞更覺險怪復有竇
深不可測其上為望湖亭見西湖明如半月又如
積雪未消柳堤一帶不知里數嫋嫋濯濯封天蔽
日而溪壑間民方田作大田浩浩小田晶晶鳥聲
百轉雜華在樹宛若江南三月時矣循溪行至山
將窮處有庵高柳覆門流水清激跨水有亭修飾
而無俗氣山餘出巉石肌理深碧不數步見水源
卽玉河發源處也水從此隱矣

白鹿巖在甕山西北越橫嶺白鹿巖在焉人鮮至者

閩人陳衍記凡客長安者未有不指西山為勝概者也然遊覽所至亦自玉泉香山華嚴而止予自馬上望全山之勢蜿蜒巖崿烟草四合意必有神工鬼斧在人跡不到之處或曰白鹿巖最奇於是挾善遊者新安周生裹糧取道登甕山絕頂度黃沙坂縋石澗而西秋高澗水僅沒踝清駛殊常挹而飲焉夾澗桑葉如綺澗窮小嶺橫之有白石如

幢屹立嶺上微有字畫然薄蝕不可辨矣越嶺諸
峯爭列芽茁不斷一峯最異即白鹿巖也巖高數
十丈嵌空欲墮中虛可旋兩車巖左一隙如窻櫺
下視深窅不知所際谷風倒射隙內琤然雖笙筑
合奏不如也相傳遼時有僊人騎白鹿往來斯巖
故以命名登巖頂矚萬壽山如豎掌指西望太行
高掛天際天矯拏飛烟雲繞之斷續無跡適風烈
不可久立而下巖角有茅舍小而整西僧居之黃

眉紅頰採草根和水以食音語不通見人嘻咲而
已不知何年代至中國棲遲此山也凡巖之木皆
偃蹇離披非平地所見獨巖口古檜一株根出兩
石相夾處盤旋橫繞倒掛於外大可數百圍色赤
如丹砂夫人不能拊虬龍而諦視之使得諦視當
如此檜矣是又巖中之最奇者也日暮歸宿甕山
次早畧至玉泉而返

聚寶山在玉泉山西南行數里度兩石橋循溪轉至卧

佛寺復二里為碧雲寺金碧鮮妍宛一天界巖下一泉
汨汨石渠導之過齋厨遶長廊出殿兩廡左右折復滙
於殿前石池泉傍一柳有大癭人呼癭柳柳左堂三楹
萬歷御題水天一色前臨荷沼沼南修竹成林巖下一
亭曰嘯雲

玉泉西七八里聚寶山碧雲寺金銀宮闕如王者
之居朱鋪文祀門堂七重重累數十階以高其除
廣夷有池廣方居以殿中有梁跨池如亘白虹池

中魚大小萬頭其色丹白青藍驪珠瑋瑁出沒藻
絲蘋葉承間如綴金玉寶珠繁露也梁之中塞以
朱欄神宗移蹕再幸樂之設帝飲梁上觀魚遂為
御道云池之水盤折而流其下洑地而至玉泉出
焉其上且隱且見經殿北澗復伏殿下出有洞又
伏落池其源至遠出者當寺後山之高壁云當源
為泉亭折泉為流觴交亭左右又前匯為池紅白
荷花茭蒲參差又前盤栢為屏屏前竹一方區細

如楷皮黃金數千百枝惹惹鳥噍噍者竹前古銀
杏蔭蔽區等於竹亭右古柳下本半皮枯臃腫若
聚若虬鱗若疣上枝細如絲青青蓋亭亭為寺中
奇駕為留半日御膳寺人進飲三留御書額二曰
蒼松古栢曰水天一色亭傍壁峭如城高可十丈
長四五十丈亭蓋處其窪間道也壁右石室三臨
澗石門石竇窻入蹋地有鐘鼓鐃吹之聲呴呴疑
其雲中盛夏涼可以衣僧云冬則燠花木之避凍

者藏焉

虎林沈守正紀碧雲寺精整勝香山而踈曠遜之
獨寺後一泉出石根冬夏不涸導為方池植白蓮
其中上有亭大小二池前修竹一林清瀟可愛予
自渡江久別此君婆婆不忍去微風徐來簌簌如
相絮語泉繞寺中庖湍皆資之恨其從屋雷下過
安得好事引為流觴可坐可畝亦一大勝也

吳郡王衡記從玉泉渡兩石橋循溪轉蔭於卧佛

寺娑羅樹之陰復二里許至碧雲西折聽泉亭上
殿前石池一而橋綰為二中畜五色魚百千頭余
解衣盤礴坐而施餅餌焉唼呷相呼雲隊再捲若
為魚麗以仰攻者

武林黃汝亨紀卧佛寺亦泉勝層巖夾道而下木
石散置可游可坐亦勝地也寺内有娑羅大樹二
株可數圍其子如橡栗僧云不但與菩提幻子可
作念佛珠碎之下酒可療心痛諸山皆無

公安袁中道紀香山跨山踞巖以山勝者也碧雲
以泉勝者也折而北為卧佛峯轉凹不聞泉聲然
門有老栢百許森立寒威逼人至殿前有老樹二
株大可百圍缺幹鏐枝碧葉虬結紆義迴月屯風
宿霧霜皮突兀千癭萬螺怒根出土磊塊詰曲叩
之丁丁作石聲殿墀周遭數百丈數百年以來不
見日月石墀整潔不容唾寺較古游者不至長日
靜寂若盛夏宴坐其下凜然想衣裘矣詢樹名或

云娑羅樹其葉若簌予乃折一枝袖之俟入城以問黃平倩必可識也卧佛蓋以樹勝者也夫山刹當以老樹怪石為勝得其一者皆可居不在整麗三刹之中野人寧居卧佛焉

香山在碧雲南二里許有永安寺舊名甘露其制一如碧雲而饒古色最勝者來青軒乃神廟所書額也金人李宴有碑其畧曰西山蒼蒼上千雲霄重崗疊翠來朝皇闕中有古道場曰香山上有二大石狀如香爐蝦蟆

有泉出自山腹下注溪谷曰小清凉西行數百步至弘
光寺殿圓製極工成化初創於中官中官高麗人見其
國金剛山有圓殿故移其製於此面其前者金章宗祭
星臺

朱長春記香山敞煥不如碧雲棟宇特盛碧雲蕩
蕩開朗有大人威嚴香山獨孤高如羽人化域陵
世焉碧雲塹削面坦夷其陽可望萬里都城如帶
香山獨牙錯門徑幽耳來青軒其至高望不一隅

但海氣蒙蒙出焉其山盤回其泉折淙其離閣參差其氣窈深其草蒙修其木離披多古殿前二枯松十圍隱千牛焉日出映之山中蓊蓊如青雲起世宗嘗幸臨登軒望之歎曰佳哉此山獨有紫翠色軒有今上御書亦兩幸矣其高於軒者山顛有亭右盤數百磴上上不留足爰爰也下須翼之猶不可趨升之望見諸陵其兩肱猶山蔽之蓋遊希至亦無題者未至亭亭在山巔至去頂復千尺按

志上有二石狀如香爐蝦蟆望之未得升焉山之
人言自香山又西以南山特奇怪崕深其靈巖佛
宮往往而是經數百里盡乃至河內彌月不能遊
然遠稍稍荒落莽蔽而此以近都獨盛以故遂不
復西

王衡紀由碧雲至香山磧路深曠夾道盡白楊青
檜雖都雅不減幽絕當山之邃者曰流憩亭其曠
而可坐眺者曰來青軒流憩在山半灌木陰翳之

中憶春季杏花飄飛盡矣而此地猶能護殘紅以
遲我念而尋舊遊焉已乃過來青軒軒前西山為
距而虛其襟以捧帝城斜照薄金銀臺蒸氣正紫
相顧謂此地宜月投枕焉而東自無量殿數折乃
至洪光寺皆短垣踈栢不蔽外景涓人甃白石為
階其淨若拭余歎曰使死不速朽者殆樂哉斯邱
矣笑而出望之東壑中鬱蒼攢錯閣道參差若飄
紅掛樹葉者其光裕寺耶心樂之而日且下春矣

不果遊

洪光寺入石門路甚修平可步古栢夾之外不見
林上不見顛枝幹交蔭人行道上蒼翠撲衣日影
注射如苐藻凌亂歷數百步復折而上如是者凡
十有一每登一折必右俯木末左瞰絕壁壁皆甃
石為之歲久若天造栢從石罅出多類鬼工初登
一二盤竒在栢稍上諸山如螺髻自栢外見則又
竒至七八盤山盡在下精藍名墅綦布繡錯金碧

晃耀日竟屢換殆無暇問栢奇矣盤窮為山門甚精麗又進為圓殿亦目所未見

洪光者即香山之支院也不復由十一盤穿栢中山徑數十步即香山藏經殿步而下即後殿從兩廊逶迤行至正殿歷級從東行至方丈自迴廊復東為來青軒羣山拱揖蒼靑刺人目下見陂陀高下杏樹可十萬株此香山之第一勝處也由方丈出見山右溪流奔注如玉龍夭矯蟄而未蘇下為

方池一注沉碧有魚數十頭出沒其間

沈守正記碧雲池亭蒼松翠栢水天一色香山來
青軒鬱秀清雅望都亭六榜皆今上御書又一聯
云恐壞雲根嫌地窄愛看山色放牆低不知出睿
思否語亦有致書似沈度學士而骨勁過之

王衡記今歲戊子春季之二十二日約友人張益
之陳錫元張仲立鄭子瞻遊香山以了花事而以
盧師足之比期而仲立以事辭錫元復拉入他隊

中余與張益之鄭子瞻周生如春者且行矣而黃
風如矢益之又謝病歸余三人獨當風行葆髮蓋
面蹇且不前也已至高梁橋而風竄然柳枝不搖
巾角微拂子瞻顧謂余是風留花耶抑花留客耶
余笑曰噫互有之半里許為真覺寺寺前浮圖高
五六丈許而上為塔五方陟其頂山林城市之勝
收焉余語子瞻此不當勝天壇耶吾於此訂雪盟
矣由真覺寺緣湖堤堤柳婀娜安水色油油然而

其下則茭芽蒲戟虛著柳絲鴨綠正與鵝黃相貼
顧尚不多得花初見花數十樹或百樹則紆騎賞
之以簪余帽且滿已而去城漸遠花漸繁則當馬
首者視之已則左右指而已小憇於望湖亭俯而
窺泉以所佩花盡施之池清颼或來紅翻綠皺悠
然有春江花月之想余乃以杯酒坐花瓣上候於
橋左雜水二停因呼子瞻和花嚼之自亭右沿山
膝行又遡一小村而香山碧雲始見見山以上下

皆漫漫遙白余曰雲也子瞻營視不應徐而曰其
雲耶將無是英英者耶已而問之山農乃真杏花
也始大叫以為奇絕相羊至卧佛寺面面皆花而
一緋杏據西原上者大可盈抱且殊麗三人緣而
上則枝輪樛覆若倒掛茱萸網網外復施百步錦
障余駘蕩不自持而日且晡矣期以明日假碧雲
道脫衣掛壺於此乃舍而至香山宿於來青軒從
軒前望花如春後薄雪髣髴滿野而不蔽穢濃草

樹之觀詰朝陳錫元從碧雲來視予予與憑軒指
畫諸勝次及新柳余曰人盡云煙柳烟安得柳容
其似者正在露葉時若眠若起半空半色之間耳
錫元深賞其言相攜而上流憇亭亭西一杏尚未
破函蓋昨歲遲我於花後者也余謂錫元曰是當
有神酬以酒祈明年花事焉

武林黃汝亨紀過香山躡蹻披磴流泉茂樹一著
屐即有軒軒白雲之氣半似吾山九里三竺間於

西山中當據上座登來青軒峯下皆蒼翠盤鬱大撮山河之勝有扁書世宗元年題此山獨有紫翠色真睿賞也餐卧彌日獨不忍去上有流憩亭不及來青甚寒泉亭更可無坐

中峯在香山之後以其居諸峯之中故曰中峯也上有庵躡危磴而上十百者三始及庵庵兩翼有亭東望京城潏潏塵土微見黃色一點大內也山之陰有晏公祠翠巖寺永壽庵山之陽有弘教寺俱稱名勝

公安袁中道記中峯庵門有石樓可眺有亭高出
半山可窮原隰牆圍可十里悉以白石壘砌高薄
雲漢修整中雜之紆曲堦磴墀徑石光可鑑不受
一塵處處可不施簾席而卧於諸山中鮮潔第一
刹中僅見一僧甚靜寂予少憇石樓下清風入戶
不覺成寐既寤復循故澗澗涸而怪石經於疾流
衝擊之後墮者偃者橫直卧者泐者背相負者欲
止未止欲轉不獲轉者猶有餘怒其岸根水洗石

出亦復皺瘦峻嶒崎嶇陷坎罅中松鼠出沒淨滑
可人舍澗而上碧峯得寺曰弘教亦有亭可眺也
有松盤曲夭矯膚皴枝拗有遠韻間有怪石佛像
清古亦為山中第一降復過翠巖循澗左行山口
中為曹家樓有橋可憇竹栢駢羅石路宛轉可三
里許青苔紫駁綴亂石中牆畔亦多斧劈石骨理
甚勁意山中概多怪石去其土膚石當自出無柰
修者意在整齊即有奇石且將去天巧以就人工

況肯為䟽通顯其突兀奮迅之勢者乎絕頂有亭
眺較遠以在山口也此處門徑弘博不如香山而
有山家清奧之趣亦當為山中第一也

又紀翠巖寺門有渠天雨則飛流自山顛來巖吼
石擊濤奔雷霆直走原麓洞駭心目刹後石路百
級有濤好鳥和鳴於疎林中隱隱見都城九衢宮
觀櫛比萬歲山及白塔寺了了可指其郊坰之林
煙水色山徑柳堤及近之峯巒疊秀樓閣流丹則

固皆几席間物出門即為登眺入門即就枕簟雖
夜色遠來猶可不廢覽矚有泉甚清可煮茗遂宿
焉風起松栢怒號震撼衝擊枕上聞其聲如在揚
子舟中駕風帆破白頭浪也予遂定計九夏居此
以避長安塵埃

武林黃汝亨紀從洪光寺過佛光寺為弘教寺有
石橋魚池不及碧雲寺前有流泉亭亦似碧雲蘭
亭意而攝境開山面過之會晉州趙孝廉飲此與

之浮三大白而別弘教之傍有巖俗稱晏公祠余
偶入視其內皆石室琢三皇五帝列聖名賢像自
吾師宣尼而下及宋朱紫陽李延平諸公兩壁又
刻畫忠臣孝子如王祥顏杲卿之屬又有小石室
題函五經書史訊之乃武廟時中貴晏公造也余
因嗟嘆自吾入西山所見金碧殿閣皆浮屠氏之
宮大都皆中人自營其身後香火藏而此室獨及
吾儒門一宗何類無賢

盧師山在京西三十里山半為秘魔巖巖石嵌空幾二丈舊傳隋末有沙門曰盧師居此山能馴伏大青小青二龍故名巖下一池二青蟄處視之若不甚深然探入不可窮

都人于奕正云石子鑿鑿故桑乾河道也曰盧師山有寺曰盧師寺正統十一年更名清涼今佛無殿已過寺半里者秘魔巖是盧師晏坐處相傳隋仁壽中師從江南掉一船來祝曰船止則止船至

崖下止遂崖居數歲二童子來曰大青小青願
侍不去歲大旱所司微禱雨者童子白師乘師願
願施雨雨一方也遂乘雲氣去俄雨大注知大青
小青是乃龍矣龍歸投潭中潭廣丈巨石覆之深
黝不可測二龍有時出雲氣仍隨之崖下塑二童
子侍師像崖上一柏產石面長尺不凋不榮是盧
師手植

翠微山在城西三十餘里上有圓通寺蓋舊平坡寺也

姚少師嘗言平坡最幽勝學佛者所宜居山半有平地故名洪熙初始改今名

從香山東行飯于善應寺中東走澗道尋盧師山
覩翠微一帶蒼石碧瓦掩映白楊深柏中而新柳
杏花希稠點綴斜分倒插盡有深情蓋香山如揚
州花市濃抹故佳而此地則若耶曲徑其不厭正
在淡粧耳從盧師寺秘魔庵循東岡而至清涼寺
寺有古佛像其前為平臺眺望甚偉自此下而南

折皆從山薺中行花柳時可觀凡折數盤涉五六
庵而至平坡寺寺一閣度山顛于遠眺尤勝

舊志山上柘樹一株屈曲如虬斜傍二潭潭水磅礴
遶峯而出其頂修竹篔簹娟不減江南

潭柘山在京西八十里出京至馬鞍山千佛閣及戒壇
至龐涓洞踰二嶺而至潭柘潭柘以一培塿當羣山心
九峯展而立焉志所謂老柘美竹者烏有矣而兩殿鵠
工絕則金元故物也寺後故有龍潭今已甃為池而其

支委尚濶去山數里泉走石崖壁間聲甚怒至寺橋而
水益怒

覺山在京西三十里懸崖之上與盧師平坡鼎峙西有
三泉曰清冷曰清香曰存至

韓家山在京西三十六里山陰有漢左馮翊韓延壽墓
韓世居于此俗呼罕山又呼黑山涯

仰山在京西七十里峯巒拱秀中有平頂如蓮花心旁
有五峯曰獨秀翠微紫蓋妙高紫微金章宗有詩刻石

云金色界中甍率景碧蓮花裏梵王宮鶴驚清露三更
月虎嘯疎林萬壑風

百花陀在京城西王平口四圍皆山中有平川約數十
畝產杉漆藥草春夏之交百花爛然有金章宗石床今
存

都人于奕正紀府西一百二十里由王平口過漢
匈奴分界處曰大漢嶺抵沿河口元女廟是百花
山足也山翠躍來引人渡石澗上馬欄山折旋其

徑左右周轉百步當直上十步以登所苦石磊磊
承趾不似土柔素車馬人趾繭生之所喜樹陰雲
影蔭蓋密稠不至曝酷逕此至法幢庵五里逕折
旋如前幸容騎而馬遶遶喘喘汗淫淫多不忍騎
者上下諸嶂縱橫一翠迎送目步不覺五里籬徑
坦然者姚庵也嶺而西行數里千佛山又數里觀
音山逕折旋如前山舊有菩提樹僊人橋望海石
盜伐樹矣橋石則存過此山石盡於空際態變矣

上下嶺者七迎前壁立者鶴子山也此去千佛巖
山石態變者盡作人形度閭王嶼是百花山腰也
百花者紅紫翠黃不可凡數不可狀喻不可名品
即一色中瓣萼跗異不可概之土人指一種尊之
曰天花豔光而幻質佛諸經每所稱天雨曼陀羅
花天雨曼殊沙花也行百花中一里進籬門石洞
禮佛殿上禮文殊閣上禮文殊法身塔下登菩薩
頂累石凡三峰登者必以小石累而尖之種佛因

故石小風大不能吹去以示曠劫無動轉故坐立
頂上俯諸山措如圭東西兩靈山也乃旁四望東
京師也南冉冉者渾河也西鬱鬱乎茶露頂居庸
諸山北蕩蕩乎邊城外沙漠際無窮也是百花山
頂也下頂未半又入百花中不可名狀數者多於
前游此者或曾見文殊光風雲作雷一聲山灝灝
如海忽左澗一圓光輪右壑徧初白次紅次五色
具木石人鳥塔語攝入光中如鏡受像我聞文殊

表智故放光莫勤五臺智光也東之龍王顏廟列
五龍王中位龍母北之大士殿髮鬚鬚鬚然下千
佛巖南之東之又入百花中花被逕八里多於前
過白水庵行泉聲一里一松標瑞雲寺寺即五代
時李克用建亭故處俗今曰百家寺也寺有摩訶
祖師法身用像法裝之若新有摩訶煮石鎚非石
非鐵瑩如漆光宣宗曾取視賜以龍袍歸寺也有
摩訶摔龍石龍逸祖追摔之今龍迹宛于石也志

稱山暖肥產杉漆藥草春夏爛紅紫香襲人則百花者藥草花耶然本草圖經中亦無從物色之

附退谷小志

退谷在水源頭傍退翁記云京西之山為太行第八徑自西南蜿蜒而來近京列為香山諸峯乃層層東北轉至水源頭一澗最深退谷在焉後有高嶺障之而卧佛寺及黑門諸剎環蔽其前岡阜迴合竹樹深蔚幽人之宮也

水源頭兩山相夾小徑如線亂水淙淙深入數里有石洞三傍鑿龍頭水噴其口又前數十武土臺突兀石獸甚鉅蹲踞臺下相傳為金章宗清水院章宗有八院此其一也水分二支一至退谷之傍伏流地中至玉泉山復出昔有人注油水中玉泉水面皆油也一支至退谷亭前引灌谷前花竹

谷口甚狹喬木蔭之有碣曰退谷谷中小亭翼然曰退翁亭亭前水可流觴東上則石門巍然曰烟

霞窟入則平臺南望萬木森森小房數楹則為退
翁書屋一榻一爐一癭樽書數十卷蕭然行脚也
谷之後高嶺峩峩攝衣而上為古瑩瑩垣之外有
臺可憇茂松蔽之不見其下

谷之東則隆教寺寺前舊在退谷上移置石門之
東殿供大士像歲久漶漫寺僧秋月募善知識繕
飾之境地深邃可供趺跏

谷之前為蒔植花竹之圃中有僧家別院養牡丹

數百本石樓孤峙面面皆花北望退谷掩映翠樾
中如懸董巨妙畫在閣之壁

谷口外沿泉東行皆石壁也大石一方上建觀音
閣再東則卧佛寺傍扉入扉娑羅古樹大可數圍
柯幹叅天瞿曇卧殿上亂後寺廢香燈久斷矣
寺門白塔高矗大松兩行擁之香翠撲人衣裾

谷西南里許為廣應寺寺有白松如雪門外深澗
石橋橫之橋傍喬松數十株箕踞其下看碧雲香

山諸寺丹甍碧瓦如蜃樓如絳闕又惝恍如夢際
谷西越澗而過則長嶺橫拖嶺半為章宗看花臺
古松一株夭矯磅礴拾級而登此則佳主人也

谷後踰嶺數重則見湯峪畫眉諸山東北烟樹迷
蒙鞏華城也又天半搖搖萬馬騰空而下天壽元
宮也廣應寺之西為木蘭陀由寺前鳥徑西指過
小橋三四徑漸峻盤旋而上始至玉皇殿殿南別
院有軒有室小樓三層踞山之巔俯視弘光寺松

盤香山來青軒諸勝殿北深澗懸崖水出洞中傍
為魚池為藥欄為篁叢殿側有滿井水可手掬西
山山頂之井廣皇寺與此為二甘冽似中泠谷中
淪茗取給二井退谷逸叟記

附記西山高隱

按漢王氏有五侯乃譚商立根逢時也五侯中王
譚實為貞臣譚雖封侯而不肯事鳳水經注王譚
不同王莽之政子興生五子並避時亂隱居涿郡

西山光武即位封為五侯元才北平侯益才安喜侯顯才蒲陰侯仲才新市侯季才為唐侯所謂中山之五王也此五侯以貞節封比前之五侯清濁不同矣本傳譚倨不肯事鳳不輔政而薨子仁嗣仁素剛正莽內憚之令人奏就國後遣使迫守令自殺是不同王莽之政者譚之後又有子仁所云興者豈即仁之弟耶因兄死而相率避亂正相因也惟仁受王莽之誅而後光武義而封其後然則

譚抗王鳳仁抗王莽興子五人並能沉冥高隱居
西山則西山以五王重矣此山苦無古蹟有如此
懿美之蹟而志不知載惜矣

軍都山在昌平州西北二十里昌平漢軍都縣以山名
也後漢盧植隱居上谷立黌肆教授生徒昭烈微時修
弟子禮焉彼時軍都縣屬上谷郡又名居庸山

銀山在昌平東北六十里峯巒高峻冰雪層積色白如
銀故名麓有石崖皆成黑色又名鐵壁頂為中峯迥出

雲霄緣石梯上五里許下視梵刹如彈丸刹乃唐時建
領七十二庵沙門鄧隱峯藏修之所有浸月泉天清橋
巨虎石誦經臺諸勝

明李元陽記曉起騎行幾二十里路人乃云赤獨
子去密雲已旬日矣衆相顧色阻南沙謂予曰銀
山鐵壁去此不遠盍往遊焉遂折北而去諸君相
尾問程或言遠或言近各有難色遲回不進南沙
與予恐為所阻遂策馬亟馳行六十里至鄧隱峯

道場八角亭東北有鐵崖壁立石色熒然頃之月
出爛如銀界洗盞更酌夜分不寐明日將拄杖登
頂寺僧曰頂由闍王鼻行僧住此十餘年亦不敢
度予二人笑而不聽竟趨鼻側山脊如刀背僅容
一足長約十步面旁如削下臨萬仞不可凝視置
風吹衣足不能立予曰列子履萬仞之險足二分
垂外何如乃去鞢鞋趺坐徘徊取棋枰對奕南沙
忽推棋東行比予回顧渠已度鼻矣予亦側身起

立逐其武而東遂相與同登山頂予曰君無議擬
予無思量乃能至此向使議擬思量東瞻西顧則
私意起而反感安能至此哉南沙曰士之立朝能
以無議擬思量之心行之何事不辦坐未有頃寺
僧憑樵者送茶各飲一盞樵者指長城外曰此為
黃花鎮此為居庸關又西為某關又東為某鎮皆
在烟光微茫中萬里龍沙風霾無際令人氣吞邊
塞眼隘寰區矣罡風稍定挺身度鼻而回初無難

者回入僧院崔都尉京山自外來曰聞二公在此
願得同遊遂舉觴薦山藪坐月下說長城險易夜
分各就宿明日京山早發來別予二人尚未下榻
飯已由捷路向昌平道中多木柵如圈初不知其
故既而問樵人乃知其為致虎圈也頃之從人告
饑遂就流泉而飯甚甘之馬上作銀山鐵壁歌夜
投昌平公署不食而卧明日荆川少海攜酒來相
勞頃之湛泉亦至因為言山水之情狀諸君頗以

不遊為恨荆川名順之編修武進人湛泉名與齡
驗封郎山西人少海名瀚考功郎順慶人南沙名
過職方郎富順人予則名元陽字仁甫號中谿大
理人為御史

玉帶山在州東北十五里山腰白石周圍如帶實拱揖
皇陵者又五里為筆架山三峯並列迥出雲表成祖元
宮在焉州之南則曰鳳凰山出城西四里至紅門兩山
並峙連翩如鳳翥州北則曰虎峪山巍巍若虎踞又十

里曰昭壁山正方如屏以作南障州東有影山遠望之
其影先見故名是為東山口州西有金山日午金光
射人又皆陵園諸山之護翼

紅門之西翠屏山下出泉九穴為池名九龍池池
上亭臺金碧輝映曼若仙都又有僊人洞在紅門
東山腰谿磔頰梯而下至洞約三丈許內有一門
巨石天成近門上有石鐘長約數尺倒垂待叩入
門轉南見有石縫如夾道元宵無際不可深入古

詩云我欲叩石鐘驚起洞中人烟蘿杳無際空鎖
石門春石洞何窈窕云是仙人庭僊人渺何許瑤
草空自清石洞窅且深花落無人掃仙翁去不還
何處尋瑤草

白浮山在昌平南一十里山有二龍潭流經白浮村元
人郭守敬引此水西折而南經甕山流入積水潭以通
漕運

郭守敬所築堰起白浮村至青龍橋延袤五十餘

里以障雙塔神山諸水名曰浮堰

駐蹕山在昌平西南二十五里高十餘丈西北袤二十里金章宗遊此鐫駐蹕字上有臺章宗自題棲雲嘯臺四字

都人王嘉謨紀自高梁橋水度至白浮甕山出薊縣境甕山斜界百望是山也南阻西湖神臯蘭若皆萃焉北通燕平叢叢砮碓背而去者百里猶見其峯焉是宜禾黍山之陽有祠焉高十五丈登之

可以望京師可以觀東潞出百望十里為長樂河
河水不甚濶而駛又北二里為玉斗潭潭箕圓僅
丈腐草晷之深不可測或云是有物焉有兩牛鬪
而飲陷於潭輒不可得又北十里為灌石駐蹕山
在焉其山長西北袤凡二十里石皆壁立高可十
餘丈嶠沓欹危如墜如挽前臨平川一望無際孤
候時隱猿鳥悲號行者懍懍西望白虎站深若天
井湛碧難盡山之上有一臺是名棲雲金章宗嘗遊

焉登臺而嘯題石而歡下而觀於野蓋燎而獵焉
召其部長大人擊毬俄而自擊也乃歎曰美哉乎
而誰見之山下石林石釜俱存山之西有洞是名
寒崖勢殊奧邃中多異草竒石灌木隨風揚芬四
望則惟北多岨云壽宮之成也上自狄村游於渾
河是嘗駐蹕自駐蹕而北皆崇山也連綴匝匝又
砂礫延緣巖間白石嶄嶄春夏雨潦則成巨浸樵
采不達又北二十里許迺從西折斜入南谷有聚

馬是名漆園園之南有山焉是名雅思是山也幽
晦多霧富有果蓏山陷而為坎有池焉浚洌如露
是名露池有比邱一人土人敬事之自園而出再
由走集西十里許為高崖崖下有衆泉遶其聚四
面皆山蔚洞森蕭壙如也又西北十里許為清水
澗是澗也兩山如門行可二十里山皆奇峭巖從
山中飛泉澎湃或決地或分流淙汨樹木之間推
激巖崖之穴青如亂鬚白如吹絮仰視重峯時有

孤石之揭揭沈黯迷離天氣自曠崖間百合忍冬
棠杜牛妳相思郁奠黃精唐求之屬滲味扶芳爍
紅隕翠飛沫擊枝墜而復起新實含濡落而不變
奇禽異羽嚶嚶滿耳鳥巢雉囿徧其巖穴山鹿之
毳豪豬之毛茸隨風沂流而行高高莫極有嶺
焉名曰鰲魚又西里許山益峻有蘭若二焉上曰
松陽下曰金鷹其上獨多松合抱而數丈者有三
樸遼者萬計登之而望則大山屏張雪然斜開則

金鷹在焉金鷹下控大巖巖吐百穴匯而為湖決而東流是為清水之源迤邐以東下山折坂而南蒼然紅赭髣髴有光有陰焉曰六十屈折汗邪黃蘆白沙之間可六十折再由走集又西有陁曰十八盤息壤如金鬱勃而立狹可容人可十八折登顧徘徊西則植立夾持不暇停足頗視斜柯洪枝匝藤蘿而舞鵲雀者深深莫極旁晚則北山矗矗一陰一陽閃儵孤日含濡雲彩山之上平行西五

里有嶺焉是曰長城蒼黯高竦下視前坂其巔瓦礫縱橫微有雉堞剝蝕沆莽是曰秦皇之址有泉出焉是曰馬跑苞稂覆之將芗矣又西二里有臺焉是曰了思衡可二畝高可數仞莎蘋匝之楸檀柏栢之木宛宛相構登之可望四方斗絕有足懷者下臺而西又十里皆峻嶺也判為中路巖之兩間如榭如障如層構深藏如旨茗盤互花實齊秀風泉並響遠聞伐木嶷嶷留滯有嶺焉是曰灰嶺

險特倍於長城石如蛤粉無樹木大石磋磋吹簫
揚塵則紛溶而起百里可見了了如雪路口如甌
甌一縱孤露瑩照通川下山有城焉是曰鎮邊之
廢邑又西八里許有城焉是曰鎮邊兩旁皆山圍
之其南曰碧駕之山曰通明之山其北曰鷹揚之
山曰涪洛之山有湖焉小而深在碧駕之巖圍結
不見每多異草中有赤鯉盈尺春夏之交山水增
流則湖益清可鑒是曰合抱之湖鎮邊巖邑也居

人僅可百數地寒不能五穀五畜勞羸不甘兵雜
其間狡猾難治西十里有堠曰唐耳背據大山下
視懷來煙液杳裏足為天險樓堞固溝洫濬軍械
精睨橫嶺而斜界居庸可甲燕平鎮邊廢邑其南
皆山也中為衢路其東曰六華之巖其西曰小神
之山曰青利之山巖分形如六華其第四巖有洞
焉最深窈土人夜登之取宿鳥忽有雙鶴飛鳴是
為鳴臯之洞南可十里有聚焉曰長峪又西五里

有巖曰德勝又曰鳳凰上有蘭若焉是山也威紆
距絕抵此而窮四面環匝山可三十丈磴道半之
登之每顧則山形變蘭若已圯然蟠結秀竦下視
三山側側欲合東望長峪蔚然開陽其左巖峯尤
峻石稍擁出山下有泉焉源源可二十里達於渾
河照映蕭瑟町畦滉然據巖而立終日無人山之
上奇樹新實甘香颼颼背秋涉冬空冗悄然萬碧
俱立山之上臺焉登之而望則颺然兩山蘭若

閉藏不可俯見是曰隱鷺之臺山之西有洞焉小
而隘可容數人門有古松蔽之坐其中以瞻西峰
有如指掌中壁刻觀世音大士像鐫刻甚深是曰
觀音之洞又曰孤松之巖蘭若講堂中有蘋婆三
株大可合抱翠葉多子團圞數丈真可奇也山之
南有嶺焉曰西峪可以入沿河山之下有碑不可
辨自長峪而東可二十里有聚焉曰菩提塹有祠
焉是祀菩提蓋古人有乞者衆食之俄而怒焉乃

殺之剖而食猶故民神之是為祠也有蘭若焉曰
白駁是山也險倍灰嶺不通行者幽阻淒藹蕭然
可詫有壇焉幢設於上皆紫英之石爛若丹霞有
銀杏二樹大可盈抱芬威多子出山而北有山焉
是曰白鶴其峯岫繚繞不易詰也其中有白色矐
然狀如鶴著於石上又折而東則走高崕北山自
高梁至德勝共百八十里小山至衆記者二十鳥
有紅鴉沙鷄文雉半翅獸有虎豹奇狸狼野干白

駁豪猪兔麀草樹多奇土人每言二月之交有山
曰青華下可萬丈西通四方每有瑰形奇物且飛
且走銜乳而西獵人莫敢近也又言三伏每雨羣
山出流大石浮浮馬奔麇至有如雷霆仰視碧駕
鷹揚之山半在雲霧戍樓晝晦飛雲積煙片片入
戶連月不霽實神京之奧區山川之都會也

岫峒崖在昭陵之北極其險峭

于奕正記岫峒崖旋旋蟠蟠望若梯磴石醜怪若

鬼面下崖之庵曰瑞峯一曰麻尼崖高危立庵逼其踵南山前逼菴而又高危冬前後兩月蔽不見日惟短至日景一線透之崖三峯而三庵兩峯翼中峯首自盤道庵以之東峯菴壁與石與樹也西若有竒焉自渡津橋以之西峯菴壁與石與樹也東若有僻焉自東西峯以之中峯菴壁與石與樹也東西若有高焉天啟中陵監飾五菴新矣三峯失其朴

妙高峯在西山後居庸關諸山之面也與天壽山相接
中開一罅即居庸關山峻而秀故以妙高稱

袁中道記妙高峯去沙河四十里遠視之惟一山
逼近則山山相倚如筍籜蹙雲駁霞極其生動其
根為千年雨溜洗去石骨稜稜每山窮處即有小
峯如筆格法雲寺枕妙高峯最高處近寺有雙泉
鳴於左右過石梁屢級而上至寺門內有方池石
橋間之水冷然沉碧依稀如清溪水色此雙泉交

會處也其上有銀杏二株大數十圍至三層殿後
乃得泉源西泉出石罅間經茶堂兩廡繞雷而下
東泉出後山經蔬園入香積而下會於前之方塘
是名香水也山石雖倩更得此水活之其秀媚殊
甚有樓可卧看諸山右有偃蓋松可覆數畝故老
云金章宗遊覽之所凡有八院此其香水院也金
世宗章宗俱好登眺往往至大房山盤山玉泉山
而其中有云春水秋山者章宗無歲不往豈即此

地耶

上方山即古稱大房山最稱奇秀古碑云幽燕奧室

閩中曹學佺紀出房山縣行六十里所過村落曰
瓦井曰天光曰孤山口皆與山勢為升降過孤山
口則崇山如環幽溪如帶時時涉溪沿壁踐苔捫
蘿乃至山麓有一庵焉為諸峯所覆如狻猊之昂
首也巉巖兩壁相距中開一線鳥道盤旋五里至
石梯梯即巨石五丁鑿為坎僅容半跬高數百磴

左右兩鐵絙長百尺山顛下垂陟者緣之手足分
任其力蓋左迫無極之巖而右臨不測之淵矣梯
盡處有小庵可憩折而東北可一里至山門入門
始昂首見諸庵縱橫稠疊處於懸崖峭壁蒙茸之
內如鳥巢然所謂禪棲也獨上方寺正中如負宸
以居躡千百磴始可到傍有兩澗流下聞而不見
水其上有冰封之耳又東折而往則連崑層陰雪
堆未化獨有古栢青青龍蟠虬舞出雪之上其崑

軒揭如仄奇秀如雲穿注如蜂房燕壘崑下有泉
深三尺廣倍之面一平臺又十倍之相傳開山時
有龍占此禪師叱之避盡挈其山泉以去師飛錫
擊其尾留泉僅滿斗今山即名斗泉也山下有洞
尚隔一山說者以此山空腹寺徑達洞然人必自
其上行上行必徑前峯孤圓突兀形如摘星望之
甚憚陟亦可至峯半可頗諸庵嶺亦劣平尚不見
洞又下五里入洞如一城僧家依洞為窟石林茅

扉可掬為客煮茗初未有水以葫蘆繫腰至洞裏
取水曳之出入尋縛枯藤為炬鱗次而進第一洞
猶隱隱見影二洞以內即黯黑無光三洞是一小
竇圍可三四尺深五六丈伏地匍匐束身蛇行即
僧所曳葫蘆處也入三洞倏高廣燎炬不見頂傍
有一潭石蜿蜒如雙龍狀其中圓光如珠於是取
水焉抵九洞無路有穴如井入者後人躡前人背
丈餘復空濶但霧氣翳塞履滑衣濕不易前進至

十三洞路尚不窮云過此無奇興盡返矣大抵中
以一曲為一洞十三洞約有六七里洞中之石玉
白鏡瑩剗為琉璃踰寸明徹其境之最著者曰蓮
花山片片如青蓮瓣曰龍虎宛肖龍虎曰長眉祖
師兀坐巖畔眉脩然垂曰呂純陽儼然具道者衣
冠曰石塔層層筆立曰石鐘鼓叩之作鐘鼓聲此
非歷三洞穿竇之苦不能得也又其最著者曰須
彌山一山甚大行良久難盡曰雪山森如積雪捫

之若刺曰萬花樓山之上
有重樓焉以雪為地吐
花如靈芝者數萬朶曰
僊人橋跨青溪而渡曰
十八羅漢為修短欹正
各狀貌曰接引旛從頂
倒懸縹緲若拂此非歷
九洞入井之危不能得
也出洞之後依然天光
迥若隔世驚喜異常

小西天即石經山也在
房山西南四十里

紀云范陽懷玉鄉西北
山水秀異出獨樹村北
行四里許兩山對峙外
隘內豁小溪中出石峯
參差

如犬牙水觸石流淥然有聲沿溪前行十數里有
巨石數十橫布水中躡之以渡登平岡而望四山
多離絕之勢峯巒峙立如書空之筆者不可勝數
其中一山若火燄而草樹獨茂問諸牧童知為田
帶山而小西天之境在焉迤邐至山麓壁立似不
可登徐望之有磴道循山之偏脊直上行者前後
頂踵相接凡三憩息始及山之半有石室題曰義
飯廳碑志云唐乾符中僧藏賁所建欲俾遊者至

此不必齋糧也由廳前折而東鑿石為道廣不滿尺橫於山腹者一里許將折而北則條石為階凡九十九級上至平處行百餘步復有階如前級差少自其上平折而南有石堂東向方廣一丈五尺許名曰石經堂堂有几案鑪瓶之屬以祀三寶皆石為之其上天然如帳頂下則甃石以平其地三向之壁皆嵌以石刻佛經字體類趙松雪意必元人所刻其中有四石柱柱之上各雕佛像數百皆

為小圓光而飾以金碧堂之前向為石扉八扇可
以啟開外有露臺縱僅八尺橫與堂稱三面為石
闌設石几石林以為遊人之所凭倚傍有禪房庖
湑之所皆因巖為之不假人力堂之左有石洞二
其右有石洞三復有二洞在堂之下方石經版分
貯其中蓋隋沙門靜琬始以經刻未成而奄化唐
貞觀後其徒道公等繼續成之至遼統和及金明
昌之際有沙門留公順公亦增刻之前後納於洞

中者通千餘卷石凡七百餘條有石幢記其目甚
悉每洞皆以石為窓櫺用鐵固之縱廣不可知而
石本之近窓者可以窺見觀其字畫則遼金所刻
與隋唐自異其左洞有靜琬貞觀八年碑記嵌於
門上大意謂未來世佛法有難故刻此藏之以為
經本若世有經願毋輒開其用心亦可謂勤矣石
洞之北有石池石井池廣七尺而深半之井深淺
不可測皆瑩然涵虛可鑑毛髮井之北十餘步有

泉自竇中出涓涓不絕又有石為龍王像民禱雨
則祀之古木蒼藤樛錯其上然陰翳慘澹不可久
居由泉竇之南復扳緣小徑盤屈數十折至山頂
有五石臺臺之上皆有白石小浮圖其南二者乃
唐金仙公主所建刻字如新餘無題識不可攷頂
有巨石後廣而前銳平出於虛空者數尺相傳謂
之曝經臺予至其上回視四山則向之特立若書
空之筆者皆隱然在履舄之下似可垂手撫摩稍

臨石之銳處而俯視之則陡絕萬仞無有底止已而下至堂中左右有碑十餘通特觀其高大者則唐元和四年幽州節度使劉濟與其僚來遊所建主僧指曰有雲居寺亦靜琬所創西偏下五里許可造乃至山麓渡小溪叢薄間寺規制已壯然比舊基差小墀中有唐時所建石浮圖四皆勒碑其上其一開元十年助教梁高望書其一開元十五年太原王大悅書其建於景雲二年者則甯思道

所書而大極元年建者則王利貞之書也然獨不
著撰文人豈即書者為之歟予次第讀之愛其字
畫清奇皆有虞褚法老僧復曰後苑中石刻猶多
遂歷榛翳間見殘碑斷碣或立或仆不知其幾而
多貞觀開元時刻

紅螺嶮在上方東三十里循九龍峪過八達嶺穿雲會
門始及下嶮再挽鐵綆而上至紅螺洞曰中嶮再上半
里為松棚庵再右百磴曰觀音洞是為上嶮

公安袁宏道紀紅螺嶮從葫蘆棚而上磴始危天
始夾從雲會門而進山始巧始纖水始怒卷石皆
躍至鐵鎖灣險始酷從灣至觀音洞仄而旋竒始
盡山皆純鍰劃其中為二壁行百餘步則日東西
變數十步則嶺背面變數步則石態貌變矣壁郭
立而陰故不樹瘦而態故不膚亦不頑蛟龍之所
洗滌霜雪之所磨鏤不工而刻其趣乃極

盤山一名盤龍山在京東薊州西北二十五里高二千

仞周百餘里勢磅礴而盤桓因名

記云自三河行五十里至盤山之麓仰望其巔元
紫迥異浮圖樹石溢於目前既入山有長泉一道
從峽壁間飛噴而下穿齧石趾鳴漈漈不已壁上
劉盤泉二字沿泉而上至中盤寺當即下盤耳東
折里許有亭左右峯勢拱抱出一岡巒隆然突吐
是為亭亭傍有松髯甲夭矯如虬龍石谿訝硯礪
甚異山之石乃從此始石有一片數斷又數片相

連若飛若走若蹲伏若臥若坐若立若負若搏噬
若撐若平若傾欹若磬然以出若畏而縮樹拳而
曲徑詰而折皆以石故至其地差行而松勢得以
少舒者上盤寺也實為山之中西有懸石亭亭趾
為平臺其崑陰百仞之上有石懸空勢壓亭表折
而東北躡嶺以登將及半嶺左望前石若巨人仰
天臥其下峭削背與山合處有光斷而不斷懸空
之妙畢呈於此上之始見長城長城者塞上山也

城與山為高下起伏山青而城白如領之有緣金玉之有相大者為虹霓小者為縞帶縹緲糾紛不可窮詰又上之始見塔體圓質素卓立雲際峻整精潔如經磨礱山有三盤而此據其上也盤山者以山之盤旋曲折而言之也或曰山有三盤焉其說近是又謂山有盤石可搖動故名下山從他道觀之石圍數丈一人搖之輒動

吳郡王衡紀出公樂十里許而山髻見若黛染頰

山頭晡乃至廣濟寺遶北而西抵環翠亭亭面山
松屏之并東西崖者為三望而第其伯仲焉質明
復緣石澗下三里許稍上而羣峯相拱揖又上則
圍山而帶林莫可辨其隅面其一峯稍遠對松立
者九華峯也峯勢峭欲摩天意氣漸上而紺宮翠
籬又自下以秀色留之杖策策然不能即行良久
穿蔡氏巷西折而陟北岡長城蜿蜒界山半如線
沙白浩浩際以濃雲猛風意色慘然越數嶺倏陡

下俯瞰巨谷窅然深黯百谷之縷紛出而繆聚於此又里許而為上方自盤山而至上方下上上幾百千折行者相望於石根木杪有相去數程而望不盈咫尺者計山形殆蛇縈而瓣襲山故名盤名當不虛上方之前曰懸石亭自此上益陡絕更百尋而至舍利塔塔標峯首五峯肩而隨焉蓋山絕頂也其西峯為無梁殿殿後稍有餘地可縱立覩層沙疊巒面面縈抱蓋盤山之外若有大盤山焉

三河寶坻甘泉長城俱在望又數里雙峯塔額隱
映樹樾如白鳥踏碧浪中自雙峯下走旱麓忽東
轉望見沉碧冉冉者曰百草窪其稍下而最深者
為天城寺寺當谷口巖壑肩背皆蔚藍紺綠相為
因依自寺上之三里許為李靖庵又二里許為舞
劍臺側東走為東甘澗又西折而為西甘澗又五
六里許至僊師臺

公安袁宏道紀盤山外骨而中膚外骨故峭石危

立望之若劍戟熊虎之林中膚故果木繁而松之
抉石罅出者崎嶇虬曲與石爭怒其餘壓霜雪不
得伸故傍行側偃每十餘丈其面削不受足其背
坦故遊者可迂而達其石皆銳下而豐上故多飛
動其疊而上者漸高則漸出高者屢數十尋則其
出必半仄焉若半圯之橋故登者慄其下皆奔泉
夭矯曲折觸巨細石皆鬬故鳴聲徹晝夜不休其
山高古幽竒無所不極

李元陽紀盤山頂上無土盤石徑四丈許有大字
刻云唐李從簡遊李靖舞劍臺蓋此石即靖舞劍
處也字刻約八寸許深

燕山在京東自西山一帶迤邐來東龍騰虎躍延袤數
百里直抵海岸

宋蘇轍詩燕山如長蛇千里限夷漢首啣西山麓
尾掛東海岸中開哆箕畢末路牽一線却顧沙漠
平南來獨飛鴈居民異風氣自古習耕戰上論召

公奭禮樂比姬旦次稱望諸君術畧亞狐管子丹
號無策亦數遊俠冠哀哉漢唐餘得失所操半從
來帝王師要在侮亡亂攻堅甚攻玉乘瑕易冰泮
中原但常治敵勢要自變會當挽天河洗此生齒
萬


碣石山水經注云大碣石山在古北平驪城縣西南王
莽改曰碣石也漢武帝亦嘗登之以望巨海而勒其石
於此今枕海有石如甬道數十里當山頂有大石如柱

形往往而見立於巨海之中潮水大至及潮波退不動
不沒不知深淺世名云天橋柱也狀若人造要亦非人
力所就韋昭亦指此以為碣石

三齊畧記始皇於海中作石橋海神為之豎柱始
皇求為相見神云我形醜莫圖我形當與帝相見
乃入海四十里見海神左右莫動手工人潛以其
腳畫其狀神怒曰帝負約速去始皇轉馬還前腳
猶立後腳隨崩僅得登岸畫者溺死於海衆山之

石皆傾注今猶岌岌東趣疑即是也

韓苑洛云東海至永平府南發出一洋東西百餘里河從此洋之西自北注之此洋正逆河也碣石在右轉屈之間碣石在海洋北洋濶五百餘里自洋南遠看如在海中實未淪入海也



欽定四庫全書

春明夢餘錄
卷六十八

五十六

春明夢餘錄卷六十八

欽定四庫全書

子部

春明夢餘錄卷六十九

七十九

詳校官檢討臣劉錫五

員外郎臣牛稔文覆勘

覆校官中書臣孫梅

校對官助教臣汪錫魁

謄錄貢生臣徐廷瑛

欽定四庫全書

春明夢餘錄卷六十九

吏部左侍郎孫承澤撰

川渠

通惠河即玉河也發源昌平州神仙泉過榆河會一畝
馬眼泉透甕山後滙為七里溝東入都城西水門貫積
水潭積水潭者皇城內西海子也又稍東從月橋入內
府環統宮殿南出玉河橋由大通橋至通州與白河合

袤一百六十里元郭守敬所鑿十里一閘蓄水濟運元
人名通惠焉入明廢不治天順二年漕運總兵官都督
楊茂先請脩之以省從張家灣陸輓者命戶部尚書楊
鼎工部侍郎喬毅往視還言通州至京城四十餘里古
有通惠河古道石閘尚存永樂間曾於此河搬運大木
以此度之船亦可行先年曾奏欲於此河積水船運又
有議欲於三里河從張家灣烟墩橋以西疏挑二十里
灣泊糧船以避水患者二事俱未施行今此河道通流

其水約深二尺不勞疏挑惟用閘蓄水令運糧衛所每船二十五隻造一剥船自備米袋挨次剥運如此則運士得省脚費而困憊少蘇矣今蒙命臣等同叅將袁佑等親詣昌平縣元人引水去處及宛平大興通州地方三里河各河道將行船故迹逐一踏勘及據元史并各閘見樹碑文所載事疏稽考回奏看得閘河原有舊閘二十四座以通水道但元時水在宮牆外船得進入城內海子灣泊今水從皇城中金水河流出難循故道行

船須用從宜改圖除元人舊引昌平東南山白浮泉水
往西逆流徑過祖宗山陵恐於地理不宜及一畝泉水
經過白羊口山溝雨水衝截俱難導引外及勘得城南
三里河至張家灣運河口袤延六十餘里舊無河源正
統間因脩城壕作壩蓄水慮恐雨多水溢故於正陽橋
東南低窪處開通壕口以泄其水始有三里河名自壕
口三里至八里始接渾河舊渠兩岸多人家廬舍墳墓
流向十里迤南全接舊河流入張家灣白河其水深處

止有二三尺淺處一尺餘闊處僅丈餘窄處未及一丈
今若用此河行船凡河身窄狹淤淺處必用濬深開闊
凡遇人家房垣墳所必須拆毀那移且以今闊處一丈
計之水深二尺若散於五丈之闊止深四寸況春夏天
旱泉脉易乾流水更少糧船剥運俱難行使兼且沿河
堤岸高者必須剷削低者缺者必須增築填塞又有走
沙急湍處俱要創開派夫脩挑倘水少又須增引別處
水來相濟若引西湖之水則自河口迤西直至西河堤

岸未免添置閘座若引草橋之水必須於大祀壇邊一路創鑿溝渠亦恐有碍況其源又止出彰義門外玉匠局等處馬跑等地泉亦不深遠大抵此河天旱則淤壅淺澀雨滂則漫散衝突徒勞人力卒難成功決不可開况元人開此河曾用金口之水勢洶湧衝沒民舍船不能行卒為廢河此乃不可行之明驗也今會勘得玉泉龍泉及月兒柳沙等泉諸水其源皆出於西北一帶山麓堪以導引滙於西湖見今大半流出清河若從西湖

源頭將分水青龍閘閉住引至玉泉諸水從高粱河量其分數一半仍從皇城金水河流出其餘從都城外壕流轉通會流於正陽門東城壕再將泄入三里河水閘住併流入大通橋閘河隨時開閉天旱水小則閉閘瀦水短運剥船雨澇水大則開閘泄水放行大舟况河道閘座見成不用增造官吏閘夫見有不須添設臣等勘時曾將慶豐平津通流等閘下板七葉剥船已驗可行若板下至官定水則其船亦可通行止是閘座河渠間

有決壞淤淺處要逐加脩濬較之欲創三里河工程甚省況前元開創此河漕運七八十年公私便宜後來廢弛今若復興則舟楫得以環城灣泊糧儲得以近倉上納在內食糧官軍得以就近關給通州該上糧儲又得運來都城與夫天下百官之朝覲四方外國之貢獻其行李方物皆得直抵都城下若此事舉行實天意暢快人心歡悅足以壯觀我聖朝京師萬萬年太平之氣象也伏望聖明早賜裁處乞勅各該衙門會計物料量撥

官匠并各營見搯官軍人等自西山玉泉一帶并都城
周圍壕塹及大通橋直抵通州張家灣一路河道分工
逐一脩濬如此則不惟省一時糧運之腳價實足以垂
萬世無窮之利益矣明年發軍夫九萬餘往治尋以災
異罷後成化十一年詔平江伯銳等濬之一年而成自
都城東大通橋抵張家灣渾河口百六十餘里漕船稍
通然坐獨引西湖泉水之半不踰二歲淺澀如舊嘉靖
六年巡倉御史吳仲請復開之上使戶部侍郎王軌工

部侍郎王詔往議軌等言漕國計也必如元人引白河
故事令大船皆可直達京師則必大興工役其費稍鉅
惟據見存故閘稍脩治之聽小車剥船並行而載且以
便歸運之軍詔可

元史中統二十八年郭守敬至上都別陳水利十
有一事其一大都運糧河不用一畝泉舊源別引
北山白浮泉水西折而南經甕山泊自西水門入
城環匯於積水潭復東折而南出南水門合入舊

運糧河每十里一置牖比至通州凡為牖七距牖里許上重置斗門互為提闕以過舟止水上覽奏喜曰當速行之於是復置都水監俾守敬領之首事於二十九年之春告成於三十年之秋賜名曰通惠役興之日上命丞相以下皆親操畚鍤為之倡咸待守敬指授而後行事置牖之處往往於地中偶值舊時輒木時人為之感服船既通行公私省便先時通州至大都陸運官糧歲若干萬石方

秋霖雨驢畜死者不可勝計至是皆罷是秋車駕
還自上都過積水潭見其舳艫蔽水大悅特賜錢
一萬二千五百緡仍以舊職兼提調通惠河漕運
事守敬又欲於澄清牕稍東引水與北壩河接且
立牕麗正門西令舟楫得環城往來志不就而罷
盧溝河出太原天池伏流至朔州馬邑從雷山陽發為
渾泉而為桑乾河鴈門應州雲中諸水皆會經太行山
入宛平縣界東南至看丹口分為二一東流至通州高

麗莊入白河是為渾河一南流至霸水合易水又南至丁字沽入運河仍從本河是河過懷來東兩山間至京城西四十里石經山東地平而土疏衝擊震盪遷徙不常往代常脩築國朝特重云

水經注云澤水至雍奴入笥溝謂之合口是矣隋圖經云澤水即桑乾河也寰宇記云桑乾水西北自昌平縣來南流經郡城西又東流經郡城南又東南與高梁河合按桑乾河即今之盧溝河也俗

呼曰渾河亦曰小黃河又名漯河以源出朔州馬
邑縣之桑乾山故曰桑乾河郡國志云范陽有張
塚臨桑乾河側名為張華村

四明王苴云渾河即桑乾河從保安舊城過沿河
口通石港口直抵盧溝河宋蘇轍渡桑乾詩北渡
桑乾水欲結心畏穹廬三尺雪南渡桑乾風始和
水開易水應生波蓋桑乾下流為渾河渾河下流
為盧溝以其濁故呼渾河以其黑故呼盧溝本一

水也渾河奔騰澎湃勢如殷雷亦曰小黃河跨河
板橋甚歌行者率猿臂渡毛骨盡竦萬歷戊子秋
九月十六日聖駕還自壽宮駐蹕功德寺明日幸
石景山觀渾河上先登中板橋諸臣翼而趨中流
顧問輔臣水從何來申時行對曰從大漠經居庸
下天津則朝宗於海矣上曰觀此水則黃河可知
因勅河臣亟脩堤岸毋妨漕計諸臣頓首謝

晉陵蔣一葵記河因桑乾山名一名漯水相傳黃

河伏流自山西馬邑縣金龍池發源流至保安舊
城燕尾河與洋河諸水合唐賈島詩無端更渡桑
乾水却望并州是故鄉即此每當晴空月正野曠
天低曙色蒼蒼波光淼淼為京師八景之一曰盧
溝曉月 又記盧溝河金人呼黑水河橋亘周行
金明昌初建正統間重修長二百餘步左右石欄
刻為獅形凡一百狀數之輒隱其一 又記盧溝
橋由西北行十里渡王家嶺嶺勢由西來蜿蜒數

里至此復西向川原獻媚林谷爭奇余登嶺南望
則渾河一線如遊龍東望則宮闕參差與石相映
北望則九陵在焉佳氣蔥蘢似領袖西山而襟帶
之者

楊榮脩堤記天下之難治者莫踰水而治水之先
者莫踰京師故大禹之蹟首在冀州豈非以水之
利害所係者大而畿甸之內宜慎其防以為弘遠
之圖也歟盧溝之河至京城西四十里石經山之

東地勢平而土脉疏衝激震蕩遷徙弗常後魏都督河北道諸軍事建成侯劉靖及子平鄉侯弘業戾陵堰以防之水患以息後人思其功謂之劉師堰歷世既久水勢漸更下流十五里距廬州不遠有白狼窩口時復衝決漫流而東浸沒田廬民弗安業聖朝建北京視河為襟帶永樂間屢嘗脩築輒復傾圯今聖天子嗣位命工部侍郎李庸內官監少監姜山義往任厥事復命太監阮公安少保

工部尚書吳公中總其事宜勅其務存堅久勿為苟且庶幾暫勞永逸群公效命材謀共濟經始於正統元年冬畢工於二年夏凡用工匠二萬餘月給糧餉以萬計累石重甃培植加厚崇二丈三尺廣如之延袤百六十五丈視昔益堅既告成賜名固安堤置守護者二十家建神祠於上有司以時修祀禮凡督事悉賜鈔幣以勞之其視築戾陵堰役費加倍而堅實亦過之

金口在京西通盧溝河

元郭守敬建議金時自燕京之西麻峪村分引盧溝一支東流穿西山而出是為金口其水自金口以東燕京以北溉田若干頃其利不可勝計兵興以來典守者懼有所失因以大石塞之今若接視故迹使水得通流上可以至西山之利下可以廣京畿之漕上納其議又言當於金口西預開減水口西南還大河令其深廣以防漲水突入之患帝

善之

三里河在城南元時名文明河接通惠河為漕儲運道
今鐵閘尚存

國初戶部楊茂疏看得京城南原有三里河直通
張家灣烟墩橋自橋往西疏濬深濶二十餘里却
將烟墩木橋改作吊橋糧船到彼灣泊可免漂流
之患若將此河濬深直至三里河作平水壩三四
截於內置匾淺剥船令運船由此盤壩以達京師

歲可省車脚數百萬乞命工部踏勘明白將在京
操備旗軍暫借分上畢事誠為經久之利

嘉靖中大學士桂萼疏近皇上遣戶工二部漕運
等官相視地方欲自大通橋直達通州將及月餘
言人人殊臣竊以為營度者未得其詳不敢不再
請皇上擇之臣聞大通橋河源出自昌平州神仙
泉南會一畝馬眼二泉繞出甕山後滙七里灤即
今之西湖東入都城西水門貫積水潭即今之海

子又東至月橋入內府南出都城東水門過大通
橋又東五十餘里至通州入白河此河元郭守敬
由古水道開濬非自守敬創始蓋西山諸水由皇
城東出每當山水泛漲由此而泄引之入白河以
濟漕運故置閘以時啓閉初非為行舟設也成化
十二年平江伯陳銳不察其故建言脩復憲宗皇
帝命戶部左侍郎翁世資工部左侍郎王詔挑濬
仍濬西湖諸泉以益水勢可放運船千餘直抵大

通橋下既而水急岸狹船不可泊未幾即耗船退
幾不能全遂不復行正德七八年亦嘗挑濬竟無
成功蓋京師之地西北高峻自大通橋下視通州
勢若建瓴而強為之且未免有害非徒無益而已
惟正陽門外東偏有古三里河一道東有南泉寺
西有玉泉庵至今基下俱有泉脉由三里河繞出
慈源寺八里莊五箕花園一帶直抵張家灣烟墩
港地勢低下故道俱存冬夏水脉不竭見今天壇

北蘆葦園草場九條巷其地下者俱河身也高者
即舊馬頭明白易見不假經畫稍加脩治即可復
也但附近勢家莊園故成化六年楊茂雖嘗建議
而不敢盡言但請置壩而已後亦竟沮不行成化
十二年踏勘而勢家買通欽天監以為地居京師
子午方位為說不知三里河乃在都城巽巳實非
子午方也今若誠按此脩濬則公私大船俱可直
抵三里河不但便搬剝而已

白河源出邊外經密雲縣霧靈山為潮河川而富河會
口河七渡河桑乾河三里河俱于此會名白河南流經
通州合通惠及榆渾諸河至張家灣總名曰潞河並南
流楊村以北通惠之勢峻若建瓴白河之流淤沙易阻
夏秋水漲則懼潦冬春水微則病澀藉濬治焉

水經注云鮑邱水又南逕潞縣故城西漢光武遣
吳漢耿弇等破銅馬五幡於潞東謂是縣矣屈而
東南流逕潞城南世祖拜彭寵為漁陽太守後寵

叛光武遣遊擊將軍鄧隆伐之軍於是水之南遺
壁故壘存焉鮑邱水又東南入夏澤澤南紆曲渚
一十餘里北佩謙澤渺望無垠按志州城北二十
五里有蠡兒淀廣袤三頃水上開花浮若金蠡而
名此即古謙澤也今廢為馬房地鮑邱水即潞河
俗名白河以其兩岸皆白沙不產青艸云

高粱河水經出自并州黃河之別源東逕昌平境沙澗
又東南經高粱店流入都城海子宋太祖伐遼與遼將

耶律沙等戰於高梁河即此

魏劉靖脩高梁河碑魏使持節都督河北道諸軍事征北將軍建城鄉侯沛國劉靖字文恭登梁山以覩源流相原隰以度形勢嘉武安之通渠美秦民之殷富乃使帳下督丁鴻軍士千人以嘉平二年於高梁河造埽開車箱渠高梁河者出自并州黃河之別源也長岸峻固直截中流積石籠以為圭高一丈東西長三十丈南北廣七十餘步依北

岸立水門門廣四丈立水碭長十丈山水暴發則
乘碭東下平流守常則自門北入灌田歲二千頃
凡所封地百餘萬畝至景元三年辛酉詔書以民
食轉廣陸發不贍遣謁者樊晨更制水門水流乘
車箱渠自薊西北逕昌平東盡漁陽潞縣凡所潤
舍四五百里高下孔濟原隰底平疏之斯溉決之
斯散道渠口以為濤門灑瀉池以為甘澤施加於
當時敷被於後世積三十六載至元康五年夏六

月洪水暴出毀損四分之三君少子駢騎將軍平鄉侯弘受命持節監幽州諸軍事遐惟前勲親詣山川指授規畧命司馬關內侯逢惲內外將士二千人起長岸立石渠脩治水門門廣四丈立水碓五尺興復載利通塞之宜準遵舊制凡用工四萬有餘諸部王侯不召而至襁負趨事者蓋數千人詩載經始勿亟易稱民忘其勞斯之謂乎於是二府文武之士感秦國思鄭渠之績魏人置豹祀之

義乃遐慕仁政追述成功是年十月十一日刊石
立表以記勲烈按此河名裏漕河北達京師長店
運艘鱗集即通惠河也

琉璃河在良鄉縣南四十里金史作劉李河有两大姓
居此也大房山孔水入焉石橋跨之形勢鉅麗橋建於
嘉靖二十年各處捐銀三十餘萬上助銀九萬三千兩
又自西山諸泉來者曰胡良河自紫荆關外鐵鎖崖入
者曰巨馬河晉劉琨守此以拒石勒處也二河俱有大

橋建於萬歷二年橋成上命輔臣張居正撰碑以頌太
后功德

潞河一名沽水一名鮑邱水記云通州城西三十里有
潞河源出北山南流

按志沽水有二即東西潞水也源自塞北丹花嶺
來合九泉水南逕安樂縣故城西南與螺山之水
合為西潞河又南逕狐奴城西與鮑邱水合為東
潞河

清河在德勝門外二十里距昌平州五十里以水清冽故名源自州境一畝泉經燕丹村東南合榆河下流為沙河經順義會白河跨清河有橋永樂間造橋因河以名跨沙河亦有橋正統間造賜名安濟劉尚書龍云過清河時微雨初霽車塵不起望昌平山若美人新沐雲鬢翠髻環列天際

榆河源自昌平境南月兒灣即古濕餘河又名溫餘河經順義縣境會白河以入潞芹城水在州東北四十里

流至蘭溝入焉又黃花鎮川河自塞外流入黃花鎮亦注焉

潮河在寶坻縣東二十里一名白龍港源自梨河洶河鮑邱河至縣界三义口合流為糧運河入於海又有柳沽河自玉田縣來渠河自香河縣來俱由縣東南注白龍港故邑有渠陽之稱

霸河距霸州城南三里為白溝河之下流志云瓦河水在城西南三百步與城南之沙塘二河合即寰宇記之

五渠也

州北達京師二百餘里川原平行厥壤卑下西北
諸山水合胡良河至州界苑家口洪波瀾漫一望
無際皆滙於此既滙而盈後乃東流出於丁字沽
注白河以入於海入海處呼為飛魚口舊築河堤
起涿州東境按固安至州境之趙村務臨津水口
經州南關有古城址相傳趙武靈王所築也堤長
三百餘里廣尋有二尺址倍之崇丈有八尺傍植

榆柳以為固其間為水口一百六十有七至文安縣之蘇家橋大城之辛張口而止

新河在灤縣西一名灤河自盧溝水分流至縣界折而為三其一徑東入白河其一為新莊河南流武清縣界其一為黃漚河東注馬家莊飛放泊

三角淀在武清縣南武清漢雍奴縣注水經云雍奴數澤之名四面有水曰雍水不流曰奴水經云沽水又東至雍奴縣西入笥溝志云縣南八十里有三角淀周廻

二百餘里即古雍奴水也筍溝其別名耳筍溝水自范甕口王家陀河及劉道口魚兒里諸水滙於大沽港水經注謂筍溝水滙衆川而東注混同一瀆云

直沽在武清縣東南八十里衛河白河丁字沽合流於此又西南合清沽港水流四十里名海口每日潮至楊村云

附新開河

薊州河運薊州軍餉也明初用遮洋船從直沽出海轉

餉薊時有漂沒天順二年開直沽河焉

唐神龍中於漁陽開平虜渠傍海穿漕以避海難
此蓋唐蹟也

昌平河運諸陵官軍餉也起鞏華城外安濟橋抵通州
渡口止袤百四十五里

密雲河運密雲官餉也本白河上流自牛欄山而下與
潮河川交會水勢深廣嘉靖三十四年總督薊遼保定
都御史楊博請捍塞就通利合以濟餉四十三年總督

劉燾發卒濬治而潮河川直達通州凡密雲鎮歲餉十萬悉用小舟轉粟省車輓入河費上嘉燾賜賚之

嘉靖十四年十一月香河縣郭家莊自開新河一道長一百七十丈闊五十一丈有奇較舊河近十餘里有司以聞命祭河神

水泉

玉泉在玉山東北泉出石罅間因鑿石為螭頭泉從螭口噴出鳴若雜佩色若素練味極甘美潄而為池廣三

丈許池東跨小石橋水經橋下東流入西湖為京師八景之一名曰玉泉垂虹往時翰林學士黃諫品泉水自郊畿論之以玉泉為第一自城內論之以文華殿東大庖厨井為第一作京師水記

水源頭在香山之北兩山相夾諸泉湧出流至退谷傍伏行地中至玉泉山復出

丹砂泉在香山下相傳為葛稚川丹井井二一泉水上湧一泉水橫流味極甘冽

卓錫泉在甕山之陽泉傍有寺曰碧雲其泉湧出繞寺而出

龍泉自金山西山下湧出匯而為池甃石為暗渠引水伏流約五里許南經功德寺前入西湖

清冷泉在京城西三十里覺山之頂味甘冽

魚藻池泉在南城東南一帶皆泉元人三里河之源也今坎而為池以養魚舊有瑤池殿

金井在京城南魏村社永樂間嘗駐蹕於此賞其甘冽

遂命甃之

義井在京城西南二十五里四圍沉碧相傳為唐時置
滿井在東直門外有泉湧出冬夏常滿

公安袁宏道紀燕地寒花朝節後餘寒猶厲凍風
時作作則飛沙走礫局促一室之內欲出不得每
冒風馳行未百步輒返二十二日天稍和諧數友
出東直門至滿井高柳夾堤土膏微潤一望空濶
若脫籠之鵠於時冰皮始解波色乍明鱗浪層層

清徹見底晶晶然如鏡之初開而冷光之乍出於
匣也山巒為晴雪所洗娟然如拭鮮妍明媚如倩
女之澣面而髻鬟之始掠也柳條將舒未舒柔梢
披風麥田淺鬣寸許遊人雖未盛泉而茗者壘而
歌者紅裝而蹇者亦時時有風力雖尚勁然徒步
則汗出浹背凡曝沙之鳥呷浪之鱗悠然自得毛
羽鱗鬣之間皆有喜氣始知郊田之外未始無春
而城居者未之知也夫能不以遊墮事而瀟然於

山石草木之間者惟此官也而此地適與余近余之遊將自此始惡能無記己亥之二月也

閩人蔣德璟記出安定門從北郊壇遠後取西北過大教場一望空濶雪殘土潤行麥田間頗有幽致二里許荒村數家錯落柴扉折而入即滿井也井三面皆窪池而井獨高黝不見底因繫石於綆測之可二十五尺下皆樹根也根下復得丈許其大可一丈圍井千百年常滿大旱不縮大寒不冰

溢井幹而出為小石函受之上有亭亭四周為小
石溝蜿蜒而下匯於池遂與東南水會於通州鴻
寶云其竒不如濟南趵突諸泉然皆地旺氣瀆湧
而成予謂自太行山迤邐數千里至西山一帶其
勢甚雄散而平陂結為都城宜吉氣之隨地起也
北人疎朴徧尋無碑碣可讀僅環池柳十餘株古
者腹穿橫斜入畫泉味甘冽予為獨酌一盃而弟
瓏兒嬉亦至鵬洲出所携酒蔬就村榻環坐限韻

作詩各一律轟飲良快日且西復移榻井前酌數
巡而歸

龍潭在盧師山潭廣丈許上有巨石覆之其下深不可
測有大青小青二龍潛於此二龍出則雲氣隨之歲旱
禱雨輒應歷代相傳俱有封號立廟於潭上歲時祭祀
九龍池在皇陵翠屏山下出泉九穴鑿石為龍水從吻
出潄而為池

學士程敏政記成化戊戌有事於西陵自昌平尋

九龍池迤西山而南絕小礧礧小騰沸石齒間馬
為之前却踰礧望前峰趨之失道徑茂淤入灌莽
中遇樵者指示乃並高阜東南行不五里忽聞雞
犬聲出谷中相顧異之俯瞰得委巷草舍隱然成
村詢之乃陵卒所居池適在其南未至池石瀨濺
濺北流入溝塍稍寬處輒有蒲苙叢翳鷺駕泳游
其下自朱門入池方廣踰十丈重垣護之覆以黃
甍石琢九龍首嵌西垣下呀然張頰噴泉沫入池

有聲泠然相應池上石壁千仞巉削如斧鑿痕泉
脉出其中山脚為小石方井識泉源檜竹桃柳夾
池東西一峰蒼然峙其南池中影沉沉紺寒門稍
東為月關洩水水淙出關東為小渠過石梁乃縈
迴西入山下田即前所見者予命從者下石磴以
碗承龍口泉飲一勺味甘爽毛骨森然聽陵卒道
文廟駐蹕泉上事久之乃去

一畝泉在昌平州西南新屯廣一畝許流入清河以資

糧運

百泉在州西南四里平地湧出不計其數中有三大泉
濶徑丈許一曰源泉一曰黃泉一曰響泉是也又有龍
泉出州東南五里之龍泉山溫泉出州西北二十五里
之湯峪虎眼泉在昌平舊縣西北城下流至豐善村入
榆河

聖水泉在房山下又西南有伏龍穴名龍城峪出湯
泉上方寺在山絕頂有泉如斗汨汨不絕

孔水洞在大房山東北懸崖千尺石竇如門深不可測
時有白龍出焉樵牧往往聞絃竹音有人乘桴窮源五
六日無所抵惟見仙鼠晝飛鰓鱗游泳而已唐開元歲
每旱必遣使投金龍玉璧禱之立應金大和中有桃花
瓣浮出其大如當五錢按孔水洞今訛為雲水洞距上
方寺南十二里

湯泉在遵化西北福泉山下

王緱山衡記取道薊州過石門石門兩山巖業正

鎖驛道道傍祠漢張將軍純以有捍禦功也又二十里為湯泉泉在山坡下初漫羨四溢戚將軍繼光始甃石為池池正壓九新堂深二丈許廣幾倍之水勢壯甚然適如石而止未至數十步聲湯湯然氣漙漙然若不可嚮邇即而俯之靜若元鑑可捧而盥其氣香其味冲泡起於下大小蠶蠶若轉念珠投以錢作蛺蝶舞與泡影相頡頏良久乃下池之南穴而下水支委於牆外種荷花一渠綠淨

可把又溝其北石屑承之穿堂而出中堂為簷除
甃為小方塘以上受雨而下引泉客至則設版馬
其東則銅龍張舌噴泉甚怒迤行入浴池池之陰
有竇焉蓄寒水浴者時其溫涼之候而啓閉之九
新堂後有池如偃月寒水所自出色正凝碧余愕
問主者具言泉本寒沁有石根可一畝類焦釜覆
之水受石性故沸所不及則不益數武之內而水
火共鼎亦一竒也已乃循行壁間讀武宗宮人王

氏詩末有溶溶一脉流千古不為人間洗冷腸之
語顧見塞外諸山層複如青蓮瓣長城為帶金湯
屹然相與歎山河兩戒之不偶時有老卒問以塞
上事對媿媿而流涕為言戚將軍將軍賞罰嚴得
士死力其所規造無論戍堞樓櫓即小小臺館皆
有意要於不可易常因材於山因力於士無侈費
而其大指則恐士卒驕惰難用故欲練磨之於斧
薪畚鍤之間蓋彼時雖外嚴斥堠內通苞苴而將

帥猶得以其意為官故其財力與精神俱閒可以
簪鼓寓軍興可以遊觀寓蒐閱今一切絞急迫促
文武吏局促自守此佳泉怪石僅以供吾輩幽閒
好事之賞而聞且有以為禁者嗟乎歎堅而網密
者數十年於茲矣蓋昔之敝竇無一焉而邊事竟
如之何也

春明夢餘錄卷六十九

欽定四庫全書

春明夢餘錄卷七十

吏部左侍郎孫承澤撰

陵園

京東北平谷縣境內漁子山有大冢俗呼軒轅臺相傳
為黃帝陵舊有廟今圯黃帝都冀故其陵在冀境內舊
云在橋山又曰在寧州非也至鼎湖龍髯之說則益荒
唐矣薊州東北有崆峒山問道廣成子處今陝西崆峒

山有元鶴謂為黃帝時物恐亦神其說耳

燕昭王墓九州要記曰在古漁陽北之無終山一統志云在府西清河岸側之燕丹村

昭王墓前有斑狸化為書生欲往見司空張華時墓前華表亦神語斑狸曰張公難籠絡子非但自誤亦且誤及老表遂見華容止風流華雅重之論及文史互有勝負言卒便退華已使人防門不得出豐城令雷煥謂華曰此千年老精必千年枯木

照之則形見遂使人伐昭王墓前華表伐者聞華表歎曰老狸果誤我於華表穴中得青衣小兒長二尺餘使還未至洛陽而變成枯木遂燃以照之狸露真形

燕靈王墓在城東金大定中改葬兩墓相連東墓之樞題其和云燕靈王舊舊蓋古樞字

秦太子墓在大城北段堤村始皇巡狩駐蹕於此幼子亡葬此

遼章宗陵在京東三河縣北五十五里

金太祖太宗陵在上京貞元三年命大房山雲峯寺為山陵建行宮於其麓宮成名曰盤寧命判大宗正寺京等如上京遷太祖太宗梓宮葬大房山太祖陵名曰睿陵太宗陵名曰恭陵

宣宗葬德陵章宗葬道陵二陵在大房山東北

萬壽王冢在阜城門外之西碑存

元人無陵遇大喪棺用楠木二片鑿空其中類人形小

大合為棺置遺體其中殮用皮襖皮帽靴襪繫腰盆盂俱用白粉皮為之殉以金壺瓶二盞一碗碟匙筯各一殮訖用黃金為箍四條以束之送至直北園寢之所深埋之用萬馬蹴平候草青方已使同平坡不可復識

嘉靖二十四年禮科右給事中陳棐疏云國家於歷代帝王陵寢之祭自伏羲以至宋孝宗三十五陵所祭之處俱實有陵墓惟順天府所祭元世宗陵絕無陵所但權於府西廟址掃堦席幄以畢事

夫既曰祭陵而實無陵臣以為通罷之便

明太宗永樂七年五月己卯營山陵於昌平縣遂封其
山為天壽山時太宗擇壽陵久不得吉壤而仁孝皇后
尚未葬禮部尚書趙昺以江西地理術人廖均卿至昌
平徧閱諸山得昌平東黃土山最吉遂即日臨視定議
封為天壽山陵前為總神路又為門門外刻石文武大
臣象獸石柱及牌樓南為紅門門內為拂塵殿外為石
牌坊各陵寶城正前為明樓樓前為石几筵又前為祔

恩殿為祓恩門各陵殿舊名享殿嘉靖十七年上躬祀
天壽山始名殿曰祓恩殿門曰祓恩門祓者祭而受福
之名也恩者罔極之思也門外為聖蹟碑亭為神庫神
厨宰牲亭

明成祖文皇帝后陵曰長陵

明仁宗昭皇帝后陵曰獻陵在長陵西

明宣宗章皇帝后陵曰景陵在獻陵東

明英宗睿皇帝后陵曰裕陵在景陵西

孝肅皇后祔

明憲宗純皇帝后陵曰茂陵在裕陵西

孝穆 孝惠皇后祔

明孝宗敬皇帝后陵曰泰陵在茂陵西

明武宗毅皇帝后陵曰康陵在泰陵西南

明世宗肅皇帝后陵曰永陵在景陵東

孝烈 孝恪皇后祔

明穆宗莊皇帝后陵曰昭陵在康陵西南

孝安 孝定皇后祔

明神宗顯皇帝后陵曰定陵在昭陵北

孝靖皇后祔

明光宗貞皇帝后陵曰慶陵在裕陵東南

孝和 孝純皇后祔

明熹宗愍皇帝陵曰德陵在永陵東

恭仁康定景皇帝 貞惠安和景皇后陵在西山前為

享殿為神庫神厨宰牲亭內官房成化年建碑亭於門

左嘉靖二十一年以神碑偏置門左非制乃改建於陵門之外

世傳西內老佛正統五年十二月廣西思恩州知州岑瑛遇一老僧於道從者呵之不避詰其度牒乃楊應能也自言此非吾姓名自金川失守大內火起吾遂潛由地道以出自湖湘入蜀至雲南復至閩最後入廣西至橫州南門壽佛寺居居十五年僧徒歸者日衆吾復遁往南寧陳步江一寺而

歸者復如之乃又去南寧雲遊四方以度歲月迤
邐至此淪落江湖垂四十年老朽殆盡早晚入土
無能為矣願送骸骨歸瑛大駭聞於巡按御史奏
之驛送赴京號為老佛途次賦詩云淪落江湖四
十秋歸來白髮已盈頭乾坤有恨家何在江漢無
情水自流長樂宮中雲氣散朝元閣上雨聲愁新
蒲細柳年年綠野老吞聲哭未休及至京朝廷未
審何人以尚膳太監吳亮建文時內使也使之審

視老佛亮見即曰不是曰我昔御便殿時棄片肉
於地汝伏地飮食之何謂不是聞楊士奇尚在能
出一認乎亮佯為不知已而復命遂取老佛入西
內壽終塋西山不封不樹載史仲彬致身錄王世
貞建文還國辨曰建文之出奔王文恪陸文裕鄭
端簡俱詳載其事以為天順中出自滇南呼寺僧
曰我朱允炆也胡濙名訪張儼健其實為我衆聞
之大驚以聞詔傳送入朝衆無識者僧曰固也太

監吳誠俾來驗之亦不識曰吾賜汝鵝肉汝兩手俱有所執伏於地而口飮之記否誠始拜而哭命居大內以壽終塋西山不封不樹而史不及之豈有所諱耶薛應旂憲章錄則言正統十二年廣西思恩州獲異僧陞州為府以知州岑瑛為知府瑛初遇老僧於道從者呵之不避詰其度牒乃楊應能也曰此非吾姓名吾有所託而逃耳汝不聞金川門事乎瑛大驚送至京師使尚膳太監吳誠試

之其說如前攷之史第云正統五年有僧九十餘
自雲南至廣西給人曰我建文也張天師言我有
四十年苦今為僧期滿宜亟返邦國以黃紙為書
命其徒清進持詣思恩府土官知府岑瑛執送總
兵官柳溥械至京會官鞫之乃言真姓名為楊行
祥河南鈞州白沙里人洪武十七年度為僧歷游
兩京雲南貴州至廣西上命錦衣衛錮禁之凡四
踰月死獄中其同謀僧十二人俱謫戍遼東邊衛

此事與應旂紀相近然應旂實借此附會前說耳
其人乃楊行祥非楊應能也建文以洪武十年生
距正統五年當六十四不應九十餘也是時英宗
少三楊皆故臣豈皆不能識而僅一吳誠識之識
又何忍下之獄而死戍其同謀十二人也且事發
於正統五年非十二年也思恩固府未聞某年陞
州為府也野史又載建文詩凡三首後二詩不及
前之悲切而自然恐皆好事者附會也大抵建文

出亡與否不可知僧臘已高當滅跡以終必不作此等詩以取禍亦必不肯出而就危地所以有此紛紛者止因楊應祥一事誤耳

顧起元曰國朝壬午之事建文皇帝遜位自鄭海鹽薛武進皆以為實然至正統復出移入京師大內云云非載於紀傳然余考之西山不封不樹之說毫無髣髴使當時果有之於時禁網業已漸弛於洪熙之後何所諱而人遂不一志其處也且以

帝之遜為真邪龍而魚服矣鳳而鴻冥矣何天
不可摩而飛何地不可鋪而葬孝康之祀忽諸
又何所戀戀於京師一坏土也弇州謂正統復
出之說妄直據史斷之其言良為有見余又疑
靖難師至日捕官搜姦爬梳亡遺當時誰敢指
后屍誑以為帝者紀又載葬帝以天子禮夫禮
以天子陵寢今在何地既不為置陵守冢又何
云以天子禮葬乎此兩說者姑以意逆之存疑

馬可也

崇禎十五年給事中沈肩培疏竊見駙馬都尉輩
永固一本奉旨著該部科詳酌確議臣不覺舉手
加額曰皇上脩明舊章無幽不闡請謚建文於此
日真千載一時殆祖宗陰牖之使言而成我皇上繼
述之善也按臣祖子木為銀臺時具疏請祀建文
大畧言建文君高皇帝太孫懿文太子嫡子五年
御宇統順系明生為金潢玉牒之上沒含斷蓬飛

草之怨心竊痛之成祖用王景議以天子禮葬遣
官致祭輟朝三日而成祖之不欲廢其祀可知也
恩詔褒祀死節諸臣是忠於建文者宜祭祀乃建
文何獨不得祀因請祀於孝陵高皇帝之傍或懿
文太子之側疏下部覆如議留中不報而要非臣
祖一人之私言也方弘治中禮部主事楊循吉亦
嘗請追謚建文而以景皇帝及元順帝為比謂親
親固當視景帝避位尤當視順帝人皆誦其不利

暨萬曆十六年國子監司業王祖嫡復以建文不宜革除景泰不宜附錄並形奏辨乃景泰附錄改正而建文年號報罷直至二十三年九月神宗始允禮臣范謙覆科臣楊天民臺臣牛應元等疏而奉有建文事蹟着附載太祖高皇帝紀之末仍存其年號之旨其難其慎越今又四朝矣推而論之不帝何以編年不帝何以議享存其年號不得不復其帝統復其帝統不得不酌其微稱與脩其祀

典事本相因理原一貫合先後諸臣之章奏神宗
需發之明綸已示顯號鴻名之漸矣且成祖不嘗
曰欲法周公輔成王乎令孺子而在未必不復辟
也又不嘗稱建文為少帝乎位號依然並未如景
泰之追廢為郕戾王也且建文得統於高皇帝尤
非若景泰之因危擁立也乃一則尊崇於易世之
後一則泯滅於數十代之餘不過謂表章遜國則
靖難無光而不知天與人歸成祖自不能避征誅

之迹勢窮事去建文亦何必存揖讓之名要以承祧
有主即冢君避野原無傷太祖之心況一脉相傳則
繼體問天更遞禪文皇之緒而何嫌何疑之有哉皇
上至仁符堯虛受邁禹遠希憲廟追崇景帝之規近
體神宗褒表忠魂之意則臣有四說於此察觀實錄
令建文自為本紀無溷附以成萬世之信史一可議
也祛西山不封不樹之訛而考尋成祖禮葬之蹟因
以表為陵園二可議也倣恭仁康定之謚法而斟酌

於二字四字之間三可議也即園為寢而春秋二
享掌於南奉常四可議也夫然後皇上之心盡二
祖列宗之心盡而三百年來臣民之心亦無所不
盡念祖德而隆孝思恢皇謨而舉廢典端在此矣
鞏都尉上疏請以建文君入祀典崇禎帝曰建文無
陵從何處祭蓋建文之死史謂葬以天子之禮所葬之
地南中杳然也又傳謂西山有天下大師之墓在金山寺
後余在退谷幾經尋訪又杳然也崇禎帝謂其無陵

信矣然加號存祀之典卒未舉行誠缺事也附載

洪武乙卯冬十月詔定陵寢朔望節序祀禮時禮部
學士樂韶鳳等奏每歲元旦清明七月望冬夏二至
日用大牢具伏臘社每月朔望日則用特羊祠祭署
官行禮如節與朔望伏臘社同日則用節禮從之

十五年夏遣使訪帝王陵寢先是上閱宋史見宋
太祖詔脩歷代帝王陵寢嘆曰此美事也遣翰林
編修蔡元侍儀舍人李震亨陳敏于謙等四方求

之仍命各行省之臣同詣所在審視若有廟祀並
具圖以聞於是陳州有伏羲氏商高宗孟津漢光
武鄭州周世宗鞏宋太祖太宗真宗仁宗鄆神農
氏寧遠舜帝延安軒轅氏西安周文王武王成王
康王漢高祖景帝咸寧漢文帝興平漢武帝長安
漢宣帝富平後魏文帝扶風隋高祖三原唐高祖醴
泉唐太宗蒲城唐憲宗涇陽唐宣宗滑縣高陽氏高
辛氏內黃商中宗順天元世祖東平堯帝曲阜少昊

氏趙城媧皇氏縈河商湯王會稽夏禹王宋孝宗凡三十六陵是年遣官行視帝王陵寢遂禁樵牧設守陵戶陵二人三歲一傳制遣道士奉香詣諸陵令有司致祭皇帝即位遣官祭告嘉靖中又有武功姜嫄后稷之祠慶都堯母之祠二十六年令車馬過陵者及守陵官民入陵者百步外下馬如違者以大不敬論躬謁陵寢記萬曆八年三月上奉兩宮皇太后率后妃謁陵行春祭禮辛亥發京次鞏華城從官行

禮畢薊遼總督官梁夢龍昌平總兵官楊四畏及
昌平州官吏師生朝見於行宮賜元輔張居正及
次輔張四維申時行膳酒有差士子駕發輦華城
至天壽山紅門降輦由左門入兩宮皇太后陞輿
上駕前導后妃後隨至感恩殿侍膳畢上陞座從
官行叩頭禮本日駐蹕感恩殿祭日質明上具青
袍奉兩宮皇太后率后妃乘輿至長陵門東降輿
皇太后后妃於陵殿左右設障屏少待導引官導

上至左門外典儀唱執事官各司其事內贊對引
導至拜位奏就位詣前上香上三上香跪訖復位
四拜傳贊同奠帛行初獻禮導至御案前獻帛導
至文皇帝御座前獻爵又導至文皇后御前獻爵
復位跪傳贊衆官皆跪讀祝俯伏興平身傳贊同
亞獻禮終獻禮執爵者代獻四拜傳贊同讀祝官
捧祝進帛官捧帛各詣燎位上退拜位之東捧祝
帛官出殿門禮畢傳贊同百官上幄次即次出先

謁永陵候駕執事官徹牲設酒果脯醢上奉兩宮
皇太后率后妃入女官奏就位行四拜禮奏上香
女官捧香皇太后三上香訖奏復位跪皇太后跪
后妃皆跪上跪於皇太后之左讀祝官跪於上後
讀訖奏興四拜禮畢出次詣永陵昭陵行禮如長
陵是日遣公徐文壁侯李言恭伯陳王謨杜繼宗
陳景行李偉分祭獻陵景陵裕陵茂陵泰陵康陵
都督沈至祭景皇帝陵寢李鶴祭恭讓章皇后中

官祭憲廟廢后吳后都指揮僉事蔣克謙祭哀冲
莊敬二太子各陵園侯張建元祭天壽山神初擬
本日仍駐蹕感恩殿聖母與上聞陵所艱於得水
且因念六軍恐難以久屯必須當即日駕回鞏華
城以扈駕謁陵行禮畢賜輔臣張居正張四維申
時行白金紵幣諭兵部以遼薊昌平迎駕官軍防
護辛苦給賞如京軍例又次賞宣大頂關防護官
軍以示朝廷撫恤恩優垂念邊兵之至意諭戶部

曰朕茲躬謁山陵經過地方百姓勞苦本年分田
租量與蠲免以示優恤甲寅駕發登華城暫駐蹕
功德寺行宮復賜輔臣酒膳奉兩宮聖母后妃御
龍舟回京文武百官軍民耆老俱於西直門迎駕
上還宮是行也上自發京以至還宮往來皆乘馬
諸供億悉從省約居人老幼扶攜載道瞻仰歡頌
達於遠近戶部請照隆慶二年例昌平州宛大二
縣免十分之五從之

察勘皇陵紀崇禎辛巳四月二十五日辰時上召
成國公朱純臣恭順侯吳惟英新樂侯劉文炳駙
馬都尉萬煒翬永固宣平伯衛時春禮部尚書林
欲楫侍郎王錫袞蔣德璟來中極殿時臣璟方病
瀉即力疾入午門直房同王公小坐旋入左掖門
纂脩館待林公頃之諸公及內閣四位俱到入皇
極殿旁直房坐是時方祈雨用青布袍角帶而上
傳令用青錦繡本等服色諸臣相顧未敢信內璫

亟趣之急令辦官出持袍帶入換交揖畢即同入
弘政門內瑞再趣云上御中極殿已久即魚貫入
中左門循殿垣高下可四十級到中極殿外鞠躬
入分東西班檻外一拜三叩頭畢上曰卿等進來
攝齊入殿內東西立上曰成國公等過來禮部過
來同過中跪上曰孝陵為高皇帝弓劍之所關係
重大會典所載近陵不許開窑取石斫伐樹木禁
例甚嚴近來法久人玩於原額四窑外開得甚多

及燒鑿紅石傷損樹木等項雖經南中諸臣回奏
還須特遣重臣親勘卿等有所見各奏來勲戚六
人各通職名奏畢大約皆言奉命往勘不敢輕徇
情面等語尚書欲楫奏勘陵須用通曉地理者同
去聞有上林苑監楊應祥頗曉堪輿可取來同看
上命即取楊應祥來左侍郎錫袞奏臣向為南京
司業祭酒頗知孝陵事體上遽令勲戚諸臣起惟
禮部三臣面對錫袞復奏孝陵自花山以下屬句

容以上屬上元向有祖窰四個天啓後漸添頗多
宜行拆毀右侍郎臣蔣德璟奏孝陵在鍾山古稱
龍蟠虎踞之地最為形勝其龍脉從茅山來歷燕
岡武岐華山白雲峯龍泉庵一帶至陵可九十里
祖制附陵二十里內禁例甚嚴今新開諸窰若碍
龍脉自當嚴禁只是愚民無知以前似不必究臣
又見宗室舉人朱統鎮曾有疏言孝陵水口關砂
諸處亦有私取紅石并陵後龍潭一帶皆當查看

又前歲有涇縣百姓全大功疏言泗州祖陵鳳陽
皇陵二處亦當照管上曰是全大功閣臣旁立對
曰是全大功臣再奏泗州地稍低聞大水時幾沒
陵山砂脚鳳陽陵龍脉來處聞亦有開鑿池塘者
上傾聽曰這奏向不曾聞得顧問閣臣皆謝不知
上命臣等起來隨曰賜宴坐臣等出檻外跪謝因
叩頭言時方祈雨齋宿不敢用酒上曰特賜酒又
謝不敢坐上命即遵旨入坐隨命內璫布席計十

三人各一席四閣臣及林尚書同坐條長桌用金蓮花杯臣錫袞臣德璟同坐鍍金蓮花杯杯高大如瓶圓可四寸下有三小蒂承之旁有荷柄儼然一大蓮花也其勲戚諸席在西皆御膳所自備蔬果各席可三十餘器皆精潔席各二花瓶插蓮花中璫云未入時上自就各席觀之且手自安花云隨召光祿寺官八人行酒酒有異香皆出御厨非光祿辦也酒三巡湯三飯一而上以齋不用酒

既畢出席謝上曰右侍郎來德璟出班將過上連
曰右侍郎蔣德璟來臣即過中跪上曰上來膝行
數步上曰再上來再膝行數步如是者三距御座
可丈許上曰汝纔奏的再奏來臣對孝陵前對茅
山後枕大江高皇帝弓劍之所自當慎重上曰泗
州鳳陽事再說來臣奏臣未曾到鳳陽亦未知其
詳只部中見全大功疏是如此說祖陵只禁附陵
二十里此外皆與民同所以愚民不知間有開鑿

灌注須查果係龍脉與否如不係龍脉則民生水利亦當照管其泗州因高陵一帶地勢亦低聞下面閘板不甚消水所以水勢壅塞時有滄浸之患上顧問閣臣曰這奏說的是鳳陽泗州須一并踏勘閣臣承旨訖臣璟將叩頭起上又令再奏來臣奏中國有三大幹龍中幹旺氣在中都結為鳳泗祖陵南幹旺氣在南京結為鍾山孝陵北幹旺氣在北京結為天壽山諸陵這三大幹本朝獨會其

全真是帝王萬世靈長之福上曰這三大幹都從崑崙山發脉來臣奏誠如聖諭儒者言南北兩戒南戒自岷山嶠冢來負地絡之陽至揚子江入海為南京北戒自黃河積石來負地絡之陰至天津入海為北京是兩大戒山河形勢皆兩京收住上曰這北戒是至天津入海麼臣奏北戒自太行山一帶過天壽西山入京城至天津便是大海結聚處就是西山一帶龍脉過處亦不宜開窑口上曰

西山一帶亦當照管起來傍立上迴顧久之即曰
成國公新樂侯禮部尚書來三臣同過上曰今命
卿等三人特往南京孝陵會同奉祀及守備神宮
監禮部禮科察勘附陵三十里及龍脉經行處并
左右砂水俱不許開石燒灰凡新添窑房悉行拆
毀樹木椿楂或宜移去或宜栽補俱詳察便宜行
至泗州祖陵鳳陽皇陵一并嚴行踏勘如有勢豪
大姓把持立行叅奏治罪欲楫奏楊應祥江西人

今丁憂回籍恐不在家有原任禮部郎中今陞浙
江提學副使王應華係臣舊屬官如楊應祥不在
即取王應華來上曰一并行文取來因賜成國公
路費二百兩綵緞二十表裏新樂侯路費一百五
十兩綵緞十五表裏尚書林路費一百兩綵緞十
表裏命再賜茶即同出檻外叩頭而出時天氣尚
熱關四大門薰風習習上寶座周圍刻金龍形一
片黃金璀璨也內置金椅及御榻以黃綾衣之諸

臣就席時上用茶間覽案上文書司禮監大璫傍立侍而諸臣坐真盛事也祖制宴羣臣皆在午門外文華門外惟郊祀慶成宴三品及學士在皇極殿永樂中召坐西內圓殿宣德中召儒臣入萬歲山廣寒殿又召遊太液池皆賜宴嘉靖中賜宴西苑然不聞侍坐亦不聞在中極者蓋正統後坐禮久廢今上崇禎十三年始議行之而中極自賜宴親王外從來未有也是日上立傳內閣取朱統鎖

全大功本查統鎖疏在丁丑四月全大功疏在丁
丑閏四月閣中不知也搜尋久之始上然當時僅
票統鎖疏有祖陵泄水故道宜清孝陵來脉小民
鑿石及句容建坊祭葬事情著該監撫按作速脩
理禁飭而大功疏則票已有旨而已上遂特發旨
二百餘言詳述孝陵及鳳泗二陵察勘事情仍鑄
關防給勅書以行禮部侍郎臣蔣德璟恭記

附蔣德璟鳳泗皇陵記泗州與盱眙縣夾淮而居

相距五里許度浮橋從州城外泝淮北行十里渡
小河即基運山也山一片皆漫土嘉靖中始改稱
基運云易輿以馬入御碑亭佳氣蔥鬱古栢萬株
數百步為紅門旁即祠祭署也世襲奉祀朱自讓
來迎引入殿前行五拜三叩頭禮殿前豎石闕四
石獸十六石馬六內臣控馬二朝臣十四殿內三
黃幄置神座德祖元皇帝后居中南向即高皇帝
高祖也懿祖恒皇帝后居東西向熙祖裕皇帝后

居西東向其陵寢神宮御器一如孝陵及天壽制
殿門後即熙祖陵所稱萬歲山者也高皇帝以世
湮遠不輕祖故斷以德祖為肇基而德懿二陵經
兵燹亦失其處故止於熙陵寢殿行望祭焉龍脉
西自汴梁由宿虹至雙溝鎮起伏萬狀為九岡十
八窪從西轉北亥龍入首坐癸向丁一大坂土也
殿則子午陵前地平壠數百丈皆高數尺統身九
曲水入懷遠從御橋東出與小河會又前為汴河

其左為徒湖為二陳溝又前即泗州城有塔又前
為大淮水水皆從西來遠陵後東北入海而淮水
灣環如玉帶皆逆水也又前即盱眙縣治米芾所
書第一山也山不甚高然峯巒橫亘八九與陵正
對即面前案山又前二百餘里為大江而陵後則
明堂九曲水遠元武又後為影塔湖又後為汴湖
又後二百里為黃河又數百里為泰山大約五百
里之內北戒帶河南戒雜江而十餘里明堂前後

復有淮泗汴河諸水環遶南東北惟龍自西來稍
高耳陵左肩十里為掛劍臺又左為洪澤湖又左
為龜山即禹鎖巫支祁處又左為老子山自老子
山北至清河縣即淮黃交會處也陵右肩六十里
為影塔湖為九岡十八窪又右為柳山為朱山即
汴梁虹宿來龍千里結穴真帝王萬年吉壤縣令
孫徵奎云大水時殿前可一尺其山較泗州城中
地高可丈餘惟御碑亭前築堤稍斜射而東一帶

人家蔽塞案山似於明堂為礙耳午飯祠祭署朱君所因與瓏煇酌數巡而歸謹按圖說稱熙祖世為句容通德鄉朱家巷人生宋李元初至元間因亂挈家渡淮至泗州見其風土醇厚居焉泗人社會常推為祭酒居泗凡三十八年一日臥屋後楊家墩下墩有窩遇二道士過指臥處曰若葬此必出天子其徒曰何也曰若以枯枝試之必生葉亟呼熙祖起祖故熟睡道士乃插枯枝去十日後熙

祖侵晨往驗果生葉因拔去生枝別易枯枝前道士復來心異之見熙祖在旁因指之曰必此人易去遂語祖曰若有福歿葬此當出天子語訖忽不見元致和二年丁卯夏熙祖歿因葬焉甫封土即自成墳仁祖年四十六冬十二月携南昌盱眙臨淮三王及曹國長公主遷於鍾離東鄉盱眙之木場里淳皇后見一異人脩髯奇貌黃冠朱裳象簡授白藥一丸神光煜煜使吞之遂孕明年天歷元


年九月十八日太祖高皇帝生聖造戊辰壬戌丁
丑丁未也遡葬期甫歲餘耳將誕之夜紅光燭天
里人起呼朱家火及至無有也舍旁故有二郎廟
時聞空中語亟徙去至晚果徙東北百餘步高皇
帝甫生淳皇后抱浴池嘆曰家貧乏襁褓具奈何
忽紅羅浮水上因取而衣之今傳為紅羅障其生
處常見五色王氣世名明光山有紅廟在焉廟在
盱眙縣靈跡鄉距縣百二十里及高皇帝龍飛定

鼎金陵追尊四代已建仁祖淳皇帝陵於鳳陽因
命皇太子至濠泗祭告祖妣於泗州然未識元
宮所在時向城西瀕河憑弔歲時遣官致祭洪武
十七年甲子十月十二日宗人龍驤衛總旗朱貴
從軍于外年老始歸即畫圖貼說識認宗派指出
居處葬處備陳靈異始末貴故偕熙祖北渡者上
即命皇太子至泗脩建陵寢號曰祖陵命禮部製
造三祖考袞冕冠服瘞殿後每歲大小二十六祭

設祭田一百四十五頃僉選人戶三百一十四戶
因授貴奉祀四品服色子孫世襲管理署事當貴
面秦陵圖時恩賜田宅鈔錠金帶衣服等物寵賚
有加令置祠署於貴先人所居之稍北其東南即
熙祖舊屋其特賜奉祀官世為葬地及貴子紱襲
前官高皇帝召入謹身殿賜膳一桌復賜御前子
鷄肉諭以莫嫌官小與國同濟而楊家墩者宋保
義大夫楊浚大理寺評事楊柟墓也命改遷於陵

西之黃岡里復諭戶部免守陵戶役及一應雜色
差糧嘗曰濠泗實朕鄉里陵寢在焉人民理宜優
恤諭署民曰隣近荒田儘力開耕永不起料不屬
有司衙門諭署官曰你衙門裏無刑名造作也不
刷卷嗣是文皇帝駕過泗州詣陵祭告賜金飾鞍
馬鈔錠田地四十四所並服役百戶內侍等官又
命朱貴子紱諭泗州降有功駕渡淮仍以令牌召
紱至營賜坐溫語移時賜父老牛酒慰勞焉列聖

承統皆遣重臣祭告景泰時以不雨弘治時以大
風傷陵樹嘉靖時以陵前山石墜以基運山從祀
方澤以皇嗣未生以脩陵工完皆遣重臣祭告萬
歷二年七月十四夜大風雨損壞殿宇門牆及湖
水衝激東南角岸命南工部郎郭子章脩理并砌
石堤二十年復命南禮侍曾朝節南工部郎沈演
周詩再築護堤二道



春明夢餘錄卷七十